CBETA電子佛典集成

CBETA Chinese Electronic Tripitaka Collection ebook

T02n0120

央掘魔羅經

劉宋 求那跋陀羅譯

目次

- 編輯說明
- 章節目次
- 巻目次
 - · 001
 - 002
 - 003
- 004贊助資訊

編輯說明

- 本電子書以「CBETA 電子佛典集成 Version 2022. Q1」為資料來源。
- 漢字呈現以 Uni code 3.0 為基礎,不在此範圍的字則採用組 字式表達。
- 梵文悉曇字及蘭札字均採用羅馬轉寫字,如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題,歡迎來函 service@cbeta.org 回報。
- <u>版權所有</u>,歡迎自由流通,但禁止營利使用。

No. 120 [Nos. 99(1077), 100(16), 125(38.6), 118-119] 央掘魔羅經卷第一

宋天竺三藏求那跋陀羅譯

如是我聞:

一時,佛住舍衛國祇樹給孤獨園。爾時,世尊與無量菩薩摩訶薩 俱,及四部眾、無量諸天、龍神、夜叉,乾闥婆、迦樓羅、緊那 羅、摩睺羅伽、毘舍遮、負多伽那阿磋羅檀那婆王,日月天子、阿 修羅及諸羅剎,護世主、四天王、魔天等俱。爾時,世尊廣說妙法 度脫眾生,名曰執劍大方廣經。初中後善,究竟顯示善義、善味, 純一清淨,具足清白梵行之相。說斯經已,舍衛城北去城不遠,彼 處有村村名薩那,有一貧窮婆羅門女名跋陀羅,女生一子,名一切 世間現,少失其父,厥年十二,色、力、人相具足第一,聰明辯慧 微言善說。復有異村名頗羅呵私,有一舊住婆羅門師,名摩尼跋陀 羅,善能通達四毘陀經。時,世間現從其受學,謙順恭敬盡心供 養,諸根純熟所受奉持。

爾時,彼師暫受王請,留世間現守舍而去。婆羅門婦年少端正,見世間現即生染心,忽忘儀軌前執其衣。時,世間現白彼婦言:「仁今便為是我之母,如何尊處而行非法?」內懷愧悚捨衣遠避。爾時,彼婦欲心熾盛泣淚念言:「彼見斷絕不隨我意,若不見從要斷其命,不使是人更餘婚娶。」即以指爪自畫其體,婬亂彌熾自燒成病,行女人諂莊嚴其身,以繩自繫足不離地。時,摩尼跋陀事畢還家,見婦自懸以刀截繩,高聲大叫而問之言:「誰為此事?」時,婦答言:「是世間現欲行非法,強見陵逼作如是事。」

摩尼跋陀先知其人有大德力,即思惟言:「彼初生日,一切剎利所有刀劍悉自拔出,利劍卷屈墜落于地,令諸剎利皆大恐怖。其生之

日有如此異,當知是人有大德力。」思惟是已,語世間現:「汝是惡人毀辱所尊,汝今非復真婆羅門,當殺千人可得除罪。」世間現稟性恭順,尊重師教即白師言:「嗚呼和上!殺害千人非我所應。」師即謂言:「汝是惡人,不樂生天作婆羅門耶?」答言:「和上!善哉,奉命!」即殺千人,還禮師足。師聞見已,生希有心:「汝大惡人故不死耶?」復作念言:「今當令死。」而告之言:「殺一一人,一一取指,殺千人已取指作鬘冠首而還,然後得成婆羅門耳。」(以是因緣名央掘魔羅。)即白師言:「善哉,和上!受教!」即殺千人少一。

爾時,央掘魔母念子當飢,自持四種美食送往與之。子見母已作是思惟:「當令我母得生天上。」即便執劍欲前斷命。

去舍衛國十由旬少一丈,於彼有樹名阿輸迦。爾時,世尊以一切智,如是知時如鴈王來。央掘魔羅見世尊來,執劍疾往作是念言:「我今復當殺是沙門瞿曇。」爾時,世尊示現避去。時,央掘魔羅而說偈言:

「住住大沙門, 白淨王太子, 我是央掘魔, 今當稅一指。 住住大沙門, 無貪染衣士, 我是央掘魔, 今當稅一指。 住住大沙門, 铅形剃髮十, 今當稅一指。 我是央掘魔, 住住大沙門, 知足持鉢十, 我是央掘魔, 今當稅一指。 住住大沙門, 無畏師子游, 我是央掘魔, 今當稅一指。 住住大沙門, 雄健猛虎步, 我是央掘魔, 今當稅一指。 住住大沙門, 儀雅鵝王 移, 我是央掘魔, 今當稅一指。 住住大沙門, 安詳龍象行, 我是央掘魔, 今當稅一指。

住住大沙門, 明朗 日初出, 我是央掘魔, 今當稅一指。 住住大沙門, 明朗盛滿月, 今當稅一指。 我是央掘魔, 住住大沙門, 莊嚴直金山, 我是央掘魔, 今當稅一指。 住住大沙門, 千葉蓮花眼, 我是央掘魔, 今當稅一指。 住住大沙門, 素齒白蓮華, 今當稅一指。 我是央掘魔, 住住大沙門, 善說真言舌, 今當稅一指。 我是央掘魔, 住住大沙門, 眉間白毫相, 今當稅一指。 我是央掘魔, 住住大沙門, 光澤紺青髮, 我是央掘魔, 今當稅一指。 住住大沙門, 猧膝傭長臂, 我是央掘魔, 今當稅一指。 住住大沙門, 離欲馬王藏, 今當稅一指。 我是央掘魔, 住住大沙門, 膝骨密不現, 今當稅一指。 我是央掘魔, 住住大沙門, 手足赤銅甲, 我是央掘魔, 今當稅一指。 住住大沙門, 輕舉躡虚足, 今當稅一指。 我是央掘魔, 住住大沙門, 迦陵頻伽聲, 今當稅一指。 我是央掘魔, 住住大沙門, 憍吉羅妙音, 我是央掘魔, 今當稅一指。 住住大沙門, 百億勝光曜, 我是央掘魔, 今當稅一指。 諸根善調伏, 住住大沙門, 我是央掘魔, 今當稅一指。 住住大沙門, 十力悉具足, 今當稅一指。 我是央掘魔, 住住大沙門, 善持四直諦, 我是央掘魔, 今當稅一指。

住住大沙門, 說八道饒益, 我是央掘魔, 今當稅一指。 住住大沙門, 三十二相具, 今當稅一指。 我是央掘魔, 住住大沙門, 八十種妙好, 我是央掘魔, 今當稅一指。 住住大沙門, 永滅諸愛欲, 我是央掘魔, 今當稅一指。 住住大沙門, 莫令我起瞋, 今當稅一指。 我是央掘魔, 住住大沙門, 未曾見奇特, 我是央掘魔, 今當稅一指。 住住大沙門, 修羅因陀羅, 及與諸羅剎, 降是三憍慢。 汝是何等人, 如是極疾行, 及我未下刀, 知時官揀住。 住住大沙門, 不聞我名耶, 我是央掘魔, 今當速輸指。 住住大沙門, 其諸眾生類, 若有聞我名, 一切皆怖死, 何況面見我, 而得全身命? 汝是誰速說, 住住大沙門, 為天為風耶? 於我前疾去。 住住大沙門, 我今已疲乏, 終不能及汝, 今當稅一指。 住住大沙門, 汝善持淨戒, 官速輸一指, 莫度我境界。」

爾時,世尊猶如鵝王,庠行七步師子顧視,為央掘魔羅而說偈言:

汝當住淨戒, 「住住央掘魔, 我是等下覺, 輸汝慧劍稅, 我住無生際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當揀飲, 永除牛死渴。 汝當住淨戒, 住住央掘魔, 我是等下覺, 輸汝慧劍稅,

我住於實際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除生死渴。 汝當住淨戒, 住住央掘魔, 我是等正覺, 輸汝慧劍稅, 我住無作際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除生死渴。 汝當住淨戒, 住住央掘魔, 我是等下覺, 輸汝慧劍稅, 我住無為際, 而汝不覺知; 我是等正覺, 汝央掘魔羅, 無上善法水, 今當輸汝稅, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 我住無老際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 而汝不覺知; 我住無病際, 汝央掘魔羅, 我是等正覺, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 我住不死際, 而汝不覺知; 汝央掘魔羅, 我是等下覺, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等下覺, 輸汝慧劍稅, 我住無染際, 而汝不覺知; 我是等正覺, 汝央掘魔羅,

今當輸汝稅, 無上善法水, 永除生死渴。 汝今當速飲, 住住央掘魔, 汝當住淨戒, 我是等正覺, 輸汝慧劍稅, 我住無漏際, 而汝不覺知; 汝央掘魔羅, 我是等下覺, 無上善法水, 今當輸汝稅, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住無罪際, 而汝不覺知; 我是等下覺, 汝央掘魔羅, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 我住於諦際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住於法際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等下覺, 輸汝慧劍稅, 我住如法際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當揀飲, 永除牛死渴。 汝當住淨戒, 住住央掘魔, 我是等下覺, 輸汝慧劍稅, 我住寂靜際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。

住住央掘魔, 汝當住淨戒, 我是等正覺, 輸汝慧劍稅, 我住安隱際, 而汝不覺知; 汝央掘魔羅, 我是等正覺, 無上善法水, 今當輸汝稅, 汝今當速飲, 永除生死渴。 住住央掘魔, 汝當住淨戒, 我是等下覺, 輸汝慧劍稅, 我住無憂際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 輸汝慧劍稅, 我是等正覺, 我住離憂際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等下覺, 輸汝慧劍稅, 我住無塵際, 而汝不覺知; 我是等正覺, 汝央掘魔羅, 無上善法水, 今當輸汝稅, 汝今當速飲, 永除生死渴。 住住央掘魔, 汝當住淨戒, 我是等下覺, 輸汝慧劍稅, 我住離塵際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等下覺, 輸汝慧劍稅, 我住無鸁際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 我住無災際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除生死渴。 汝當住淨戒, 住住央掘魔, 我是等正覺, 輸汝慧劍稅, 而汝不覺知; 我住無惱際, 我是等正覺, 汝央掘魔羅, 今當輸汝稅, 無上善法水, 汝今當速飲, 永除生死渴。 汝當住淨戒, 住住央掘魔, 我是等下覺, 輸汝慧劍稅, 而汝不覺知; 我住無患際, 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 我住離患際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 我住無有際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 我住無量際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等下覺, 輸汝慧劍稅, 我住無上際, 而汝不覺知; 我是等正覺, 汝央掘魔羅,

今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 我住最勝際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住於恒際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 我住等高際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住於上際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 而汝不覺知; 我住不壞際, 汝央掘魔羅, 我是等正覺, 今當輸汝稅, 無上善法水, 永除牛死渴。 汝今當揀飲, 汝當住淨戒, 住住央掘魔, 我是等下覺, 輸汝慧劍稅, 我住不崩際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住無邊際, 而汝不覺知; 汝央掘魔羅, 我是等正覺, 無上善法水, 今當輸汝稅, 汝今當速飲, 永除生死渴。 汝當住淨戒, 住住央掘魔, 我是等下覺, 輸汝慧劍稅, 我住不可見, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 輸汝慧劍稅, 我是等正覺, 而汝不覺知; 我住深法際, 我是等正覺, 汝央掘魔羅, 今當輸汝稅, 無上善法水, 永除生死渴。 汝今當速飲, 住住央掘魔, 汝當住淨戒, 我是等正覺, 輸汝慧劍稅, 我住難見際, 而汝不覺知; 我是等正覺, 汝央掘魔羅, 無上善法水, 今當輸汝稅, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 我住微細法, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 我住滿法際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 我住極難見, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除生死渴。 汝當住淨戒, 住住央掘魔, 我是等正覺, 輸汝慧劍稅, 而汝不覺知; 我住無定法, 我是等正覺, 汝央掘魔羅, 今當輸汝稅, 無上善法水, 汝今當速飲, 永除生死渴。 汝當住淨戒, 住住央掘魔, 我是等下覺, 輸汝慧劍稅, 我住無諍際, 而汝不覺知; 汝央掘魔羅, 我是等正覺, 無上善法水, 今當輸汝稅, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 我住無分別, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 而汝不覺知; 我住於無際, 汝央掘魔羅, 我是等正覺, 今當輸汝稅, 無上善法水, 汝今當速飲, 永除生死渴。 汝當住淨戒, 住住央掘魔, 我是等正覺, 輸汝慧劍稅, 我住解脫際, 而汝不覺知; 汝央掘魔羅, 我是等下覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 而汝不覺知; 我住寂靜際, 汝央掘魔羅, 我是等正覺, 今當輸汝稅, 無上善法水, 永除生死渴。 汝今當速飲, 住住央掘魔, 汝當住淨戒, 我是等正覺, 輸汝慧劍稅, 而汝不覺知; 我住寂止際, 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住上止際, 而汝不覺知; 我是等下覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住無斷際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住彼岸際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 而汝不覺知; 我住美妙際, 我是等正覺, 汝央掘魔羅, 今當輸汝稅, 無上善法水, 永除牛死渴。 汝今當揀飲, 汝當住淨戒, 住住央掘魔, 輸汝慧劍稅, 我是等正覺, 我住離虛偽, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住破宅際, 而汝不覺知; 汝央掘魔羅, 我是等正覺, 無上善法水, 今當輸汝稅, 汝今當速飲, 永除生死渴。 住住央掘魔, 汝當住淨戒, 我是等下覺, 輸汝慧劍稅, 我住伏慢際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 輸汝慧劍稅, 我是等正覺, 我住伏幻際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 我住伏癡際, 而汝不覺知; 我是等正覺, 汝央掘魔羅, 無上善法水, 今當輸汝稅, 汝今當速飲, 永除生死渴。 住住央掘魔, 汝當住淨戒, 我是等下覺, 輸汝慧劍稅, 我住於捨際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 而汝不覺知; 我住法界際, 汝央掘魔羅, 我是等正覺, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 我住無入際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除生死渴。 汝當住淨戒, 住住央掘魔, 我是等正覺, 輸汝慧劍稅, 我住純善際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等下覺, 輸汝慧劍稅, 我住出世際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 我住無動際, 而汝不覺知; 我是等正覺, 汝央掘魔羅, 今當輸汝稅, 無上善法水, 永除牛死渴。 汝今當速飲, 汝當住淨戒, 住住央掘魔, 我是等正覺, 輸汝慧劍稅, 我住殿堂際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 我住不悔際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住休息際, 而汝不覺知; 汝央掘魔羅, 我是等正覺,

今當輸汝稅, 無上善法水, 永除生死渴。 汝今當速飲, 住住央掘魔, 汝當住淨戒, 我是等正覺, 輸汝慧劍稅, 我住究竟際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住三毒斷, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住煩惱斷, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住有餘斷, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 而汝不覺知; 我住三毒盡, 汝央掘魔羅, 我是等正覺, 今當輸汝稅, 無上善法水, 永除牛死渴。 汝今當揀飲, 汝當住淨戒, 住住央掘魔, 我是等下覺, 輸汝慧劍稅, 我住於滅際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 而汝不覺知; 我住於捨際, 汝央掘魔羅, 我是等正覺, 今當輸汝稅, 無上善法水, 汝今當速飲, 永除生死渴。 汝當住淨戒, 住住央掘魔, 我是等下覺, 輸汝慧劍稅, 我住覆護際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 而汝不覺知; 我住依怙際, 我是等正覺, 汝央掘魔羅, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 我住趣向際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 而汝不覺知; 我住洲渚際, 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 而汝不覺知; 我住容受際, 汝央掘魔羅, 我是等正覺, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅,

我住伏慳嫉, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除生死渴。 汝當住淨戒, 住住央掘魔, 我是等正覺, 輸汝慧劍稅, 而汝不覺知; 我住離渴際, 我是等正覺, 汝央掘魔羅, 今當輸汝稅, 無上善法水, 汝今當速飲, 永除生死渴。 汝當住淨戒, 住住央掘魔, 我是等下覺, 輸汝慧劍稅, 而汝不覺知; 我住捨一切, 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 我住離一切, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 而汝不覺知; 我住一切止, 汝央掘魔羅, 我是等正覺, 今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 我住斷道際, 而汝不覺知; 汝央掘魔羅, 我是等下覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住空樂際, 而汝不覺知; 我是等正覺, 汝央掘魔羅,

今當輸汝稅, 無上善法水, 汝今當速飲, 永除生死渴。 住住央掘魔, 汝當住淨戒, 我是等正覺, 輸汝慧劍稅, 我住結斷際, 而汝不覺知; 汝央掘魔羅, 我是等正覺, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住愛盡際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 我是等正覺, 輸汝慧劍稅, 我住離欲滅, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 住住央掘魔, 汝當住淨戒, 我是等正覺, 輸汝慧劍稅, 我住涅槃際, 而汝不覺知; 我是等正覺, 汝央掘魔羅, 今當輸汝稅, 無上善法水, 汝今當速飲, 永除牛死渴。 汝當住淨戒, 住住央掘魔, 輸汝慧劍稅, 我是等正覺, 汝當捨利刀, 疾來歸明智, 非法謂為法, 莫隨惡師慧, 應甞至藥味, 然後深自覺, 一切畏杖痛, 莫不愛壽命。 取己可為譬, 勿殺勿教殺, 如己他亦然; 如他己不異, 取己可為譬, 勿殺勿教殺, 莫作羅剎形, 人血常塗身; 人血塗利劍, 不官恒在手, 速捨首指鬘, 離是二生業;

二牛非法求, 是則惡羅剎, 羔羊於母所, 猫尚知孝養; 哀哉汝可愍, 為惡師所誤, 揮手奮利劍, 而欲害所生。 汝今所浩業, 惡逆過禽獸, 殺害甚羅剎, 兇暴踰修羅; 永入弊魔黨, 長與人類分, 咄哉惡逆者, 母恩世難報; 懷仟十二月, 將護盡胎養, 既生常鞠育, 長夜忍苦穢; 今目觀汝母, 血淚盈目流, 忘身愛念汝, 躬自持食來; 風吹髮蓬亂, 塵十坌污身, 手足悉龜坼, 眾苦集朽形; 寒暑亦備經, 久受飢渴惱, 愁毒恒怨嗟。」 逼切心狂亂,

爾時,彼母見佛世尊與央掘魔羅往反苦論,子心降伏縱身垂臂,念其子故說偈白佛:

「久失寶藏今還得, 塵穢壞眼今明淨, 哀哉我子心迷亂, 常以人血自塗身。 極利刀劍恒在手, 多殺人眾成屍聚, 當令此子隨順我, 今敬稽首等正覺, 多人見罵難聽聞, 汝子如是切責我。」

爾時,世尊告央掘魔羅:「此樹下者是汝之母,生育之恩深重難報,云何欲害令其生天?央掘魔羅!非法謂法,如春時焰渴鹿迷惑,汝亦如是,隨惡師教而生迷惑,若諸眾生非法謂法,命終當墮無擇地獄。央掘魔羅!汝今疾來歸依如來。央掘魔羅!莫怖莫畏。如來大慈是無畏處,等視眾生如羅睺羅,救療眾疾無依作依;如來安隱是穌息處,諸無親者為作親善,諸貧乞者為作寶藏,失佛道者示無上道;為諸恐怖而作覆護,為諸漂溺而作舟梁。汝當疾捨利劍出家學道,頂禮母足悔過自洗,至誠啟請求聽出家,濟度汝母離三

有苦。今輸稅汝出家具足,汝今當飲甘露法水,汝久遊惡道迷亂疲 倦,今當休息。汝是稅主我亦稅主,為守道王於一切眾生常受其 稅,令得超渡生死有海。」

爾時,央掘魔羅即捨利劍,如一歲嬰兒捉火即放,振手啼泣;時, 央掘魔羅捨鬘振手發聲呼叫,亦復如是。如人熟眠蛇卒齧脚,即時 驚起振手遠擲;央掘魔羅速捨指鬘,亦復如是。爾時,央掘魔羅如 離非人所持,自知慚愧,血出遍身淚流如雨。譬如有人為蛇所螫, 良醫為呪令作蛇行;央掘魔羅宛轉腹行三十九旋,亦復如是。然後 進前頂禮佛足,而說偈言:

「奇哉正覺第一慈, 調御人師為我來, 今我得度無知海, 愚癡閨冥濤波惑。 奇哉正覺無上悲, 調御人師為我來, 度我生死曠野難, 種種煩惱棘刺林。 奇哉正覺第一喜, 調御人師為我來, 今我得度諸迷惑, 邪見虎狼禽獸難。 奇哉正覺第一捨, 調御人師為我來, 永離熾然無量苦。 **令我得度無擇獄**, 無親厚者為作親, 無依怙者為作依, 集眾惡業趣大苦, 今為我來作歸依。」

爾時,世尊告央掘魔羅:「汝今可起,速往母所,至誠悔過求聽出家。」爾時,央掘魔羅從佛足起往至母所,圍旋多匝五體投地,至誠懺悔悲感大叫,即向其母而說偈言:

「嗚呼慈母我大過, 集諸惡業成罪積, 隨惡師教行暴害, 殺人一千唯少一; 我於今日歸依母, 亦復歸依佛世尊, 我今稽首禮母足, 唯願哀愍聽出家。」

爾時,彼母說偈答言:

「我今已聽汝, 出家為後世,

我亦求如來, 出家受具足。 奇哉難思議, 如來無有譬, 佛今度我子, 普哀諸世間。 如來妙色身, 功德無倫匹, 我今少稱歎, 最勝天中天。」

爾時,世尊以偈答言:

「善哉善女人, 當得無間樂, 今可聽汝子, 於我前出家。 汝今年衰老, 出家時已過, 但當深信樂, 以法自穌息。 汝今且小待, 波斯匿王至。」

爾時,天帝釋將諸天眾、婇女眷屬,放身光明照舍衛國,見央掘魔羅與佛相抗,力屈心變摧伏歸悔,發大歡喜而說偈言:

「奇哉十力雄, 調御無與等, 降伏央掘魔, 常血塗身過, 檀那因陀羅, 阿修羅羅剎, 兇暴夜叉鬼, 及餘諸惡人, 那伽緊那羅, 大力迦樓羅, 彼聞央掘魔, 恐怖皆閉目, 見而不恐怖。 何況人中王, 彼初出生時, 龍神咸振懼, 一切諸刹利, 錯解刀劍落, 何況人中王, 見而不恐懼。 如來悉調伏, 如是兇惡業, 智慧境亦然。 佛力不思議, 奇哉央掘魔! 善住無染戒, 梵行甚清淨, 猶如直金山。 奇哉我今日, 快得善法利! 我今當施與, 央掘魔羅衣, 唯願為我受, 世尊哀愍故, 沙門隨法服, 今施央掘魔, 是大乞士王, 世尊善觀察。」

爾時,帝釋白央掘魔羅言:「唯願大士!受此天衣以為法服。」 時,央掘魔羅謂帝釋言:「汝是何等蚊蚋小蟲!我豈當受不信之 施?汝是何等貪欲之驢!未度生死眾苦長流,自性羸形何能施衣? 當知汝是自性羸形,何能施人無價之衣?譬如國王有千力士,未見 怨時便已躃地,何能與彼敵國大王千力十戰?如是我受無價衣者, 何能降伏億煩惱魔及自性魔?我當斷除無量煩惱如佛所歎,十二頭 陀沙門行法我應當學,汝非天王無異生盲。汝天帝釋!不知差別, 何等名為兇暴惡業?汝是蚊蚋,安能知我是兇惡人耶?嗚呼帝釋! 汝知央掘魔羅是兇惡人,又能解知佛法正義,何等沙門初始出家習 無價衣耶?汝都不知出家淨法。嗚呼帝釋!汝是如來正法外人,如 來長子上座迦葉,有摩尼等八萬寶庫及餘寶藏其數無量,并餘種種 無價寶衣棄之如唾,出家學道行沙門法,受行十二頭陀苦行,何故 不習無價之衣為放逸耶?上座迦葉棄捨種種甘饒之食,捨肉味食, 受持修行不食肉法,家家乞食不惡惡想,始終常一苦樂無變,其所 乞處有種種人,或言無者,或罵辱者,答言:『安樂。』然後捨去 心不傾動。若言有者,不生貪喜。答言:『安樂。』受之而去心不 傾動。若以大財施眾僧者,於未來世眾僧受用,——寶藏無有窮 盡,以何等故不奉施僧?而自分付餓鬼、貧窮孤獨乞乞。帝釋!沙 門法者不多積聚,乃至鹽油亦不受畜,是沙門法;奴婢田宅、若賣 若買諸不淨物,非沙門法,是在家法;若施若受諸不淨物,悉皆如 是。汝大愚癡聚!如是等輩今當調伏,如治稊稗害善苗者,我之所 殺作指鬘者,彼等悉是壞法眾生,無有一人是比丘、比丘尼、優婆 塞、優婆夷者。」

爾時,帝釋謂央掘魔羅:「不害相者是則為法,如來等視一切眾生如羅睺羅,云何聽許調伏惡人?」

央掘魔羅言:「害與不害差別之相,汝云何知?如幻士方便他所不知。如是菩薩知幻境界,汝佛法外人,云何能知害與不害各有二

種?有聲聞不害,有菩薩不害。汝小蚊蚋,云何能知二種不害?汝 之境界及菩薩境界差別之相,猶如蚊翼覆於虚空。譬如沙門非人所 持,爾時,大眾應守護不?」

帝釋答言:「應當守護。」

問言:「若因護死,誰應得罪?」

帝釋答言:「淨除害心無得罪者。」

央掘魔羅言:「如是調伏諸惡象類,若令彼死,守護之人無得罪者,當得無量殊勝功德。如是,害不害相差別難知,是名菩薩不害。」問言:「譬如良醫療治病人以鉤鉤舌,彼若死者,醫有罪不?」

答言:「無也。彼良醫者多所饒益,除有害心。」

問言:「如是調伏諸惡象類,若令彼死為有罪不?」

答言:「無也。當得無量殊勝功德,除有害心。」

問言:「譬如弟子從師受學,因教而死,師有罪不?」

答言:「無也。除有害心。」

問言:「如是威德眾生、明顯眾生,惡象類者見之而死,有遮罪

不?」

答言:「無也。除有害心。」

「是故,帝釋!汝不知善業惡業差別之相,不知沙門非沙門差別之相,諸惡象類壞正法者應當調伏,如上座迦葉等八十大聲聞,乃至億耳,一切皆捨諸大寶藏,出家學道,於正法中少欲知足,比丘何

須習無價衣?是等一切剃髮除慢,孤遊持鉢乞食活命著壞色衣,如 是比丘云何放逸?常為寒暑饑渴所逼,足蹈塵土恒如野鹿,不越小 戒如犛牛愛尾,守護不捨如烏伏子,如折牙象無復形好,彼復何須 習無價衣?汝正法外人慎勿復語,如彼外道旃陀羅輩,畢竟不入二 生眾中,汝亦如是,是正法外旃陀羅也,汝小蚊蚋默然無聲。」

央掘魔羅經卷第一

央掘魔羅經卷第二

宋天竺三藏求那跋陀羅譯

爾時, 娑婆世界主梵天王, 放大光明照舍衛國, 一心合掌頂禮佛足, 供養如來及央掘魔羅已, 而說偈言:

「奇哉我今見大戰, 如二雄猛師子鬪, 奇哉調御天人師, 如來善調央掘魔。 譬如毒蛇見呪師, 吹氣放畫不怖畏, 師即調伏今寂靜, 三界大師亦如是。 調伏兇惡央掘魔, 我今稽首三界醫, 大神通力不思議, 我今稽首自在王。 大天所建甚奇特, 以法建立央掘魔, 所為最勝無可譬, 是故名曰無譬尊。 住戒調伏極寂靜, 央掘魔今為勝業, 身心安隱無所畏, 猶如自性直金色, 純淨極妙閻浮金。 唯願如來哀受施, 當令我得大菩提, 今央掘魔服天衣, 彼服此衣護梵行, 究竟清淨心不動。」

爾時,央掘魔羅謂梵王言:「汝是何人多言、兩舌言:『央掘魔羅習近我衣久持梵行。』而見毀辱,汝是惡梵非梵梵像。汝蚊蚋來所言:『梵者。』梵有何義?云何名為世間梵業?我豈服習蚊蚋之衣而修梵行?我亦不作傭作之人,我亦不能隨他所欲,我亦不為負債之人,如申頭羅(申頭羅者外國幻人作飛人戲,令空中來去往返至速)速往速反。汝小蚊蚋亦復如是,往受梵樂還來墮此,不知菩薩受生真實功德,非法為法,如汝等輩不覺生死迷惑輪轉。嗚呼梵天!汝真知善惡?言央掘魔羅大作惡業,汝蚊蚋惡梵為何所知?應當修學菩薩所行。」

爾時,梵王答央掘魔羅言:「汝現殺人一千少一,今猶見汝強梁不息,乃至鷼鷲不敢近汝。此非強梁者,何處更有真強梁耶?此非惡

魔者,何處更有真惡魔耶?央掘魔羅!汝莫放逸,所作惡業方便除滅。善哉如來!真為大悲,乃能度此央掘魔羅等兇暴眾生。」

爾時,央掘魔羅謂梵王言:「惡梵蚊蚋汝將何去?汝復當於何處迷轉?不知善惡眾生死墮惡道。譬如有人行至叢林,夜見樹上有螢火蟲驚怖而還,語城中人言:『彼林被燒。』時有眾人俱往視之,見是螢火知非林燒。今汝惡梵亦復如是,唱言:『我癡。』而自欺誑及欺餘人,汝及餘人後自當知是幻積聚。譬如癡人行至叢林見無憂樹華,謂呼是火,恐怖而歸,還入城中告眾人言:『彼林被燒。』眾人往見知非是火。汝小蚊蚋亦復如是,汝及餘人後自當知善及不善,亦自當知是幻積聚,莫復更出此不實言,汝當默然勿學妄語。」

爾時,護世四王來詣佛所,大供養佛及央掘魔。設供養已,即向如來及央掘魔羅,而說偈言:

爾時,央掘魔羅謂四天王言:「汝是何等蚊蚋小蟲?護世護世而自 貢高,唱言:『我當施汝天鉢。』而見毀辱。汝等且待觀我難事,須臾自見執持瓦器,何用如是放逸鉢為?而以護世高自稱舉,名護世者,謂能調伏諸惡象類,非護世間護真實法,名為護世。譬如有人聞俱耆羅聲,又見其形,尋復見烏而生迷惑,作是說言:『俱耆

羅俱耆羅。』汝等如是,非法為法守護非法,如彼見烏謂俱耆羅。汝應護法莫護世間。蚊蚋四王且各默然。」

爾時,惡魔波旬來詣佛所,供養佛已却住一面,向央掘魔羅而說偈言:

「汝今速出家, 欺誑入我城, 我亦不念汝, 且令出泥犁。」

爾時, 央掘魔羅以偈答曰:

爾時,摩醯首羅神為如來及央掘魔羅,設大供養已却住一面,欣敬 交至以偈歎言:

「我今禮尊足, 於敬說伽陀,如來妙色身, 譬如優鉢羅。 齒白拘牟頭, 目淨千葉華, 智慧無染污, 淨踰分陀利。 奇哉央掘魔! 殊勝甚希有, 住在凡夫地, 而能降伏魔, 當速成正覺, 普救諸世間。」

爾時,央掘魔羅以偈答言:

「汝是何卑趣? 妄稱摩醯羅,

假名為自在, 非直自在王。 汝今云何知, 我住凡夫地? 長牙毘舍遮, 宜速答所問。 形色尚醜陋, 猶如癩病人, 而為諸世間, 廣說治癩方; 白病不能救, 安能療他疾? 今汝/\蚊蚋, **癡惑亦復然。** 不知自趣性, 云何知他心? 而言央掘魔, 住在凡夫地。 汝不應灌頂, 副他自在王, 無知且默然, 須臾自當見。」

爾時,如來所依坐樹,其樹有神,見央掘魔羅心生敬信,以偈歎言:

「疾來央掘魔, 勇慧堅固士, 今請服法衣, 供施汝初飯, 施汝及如來, 當得第一果。」

爾時,央掘魔羅以偈答言:

「如來未曾食, 聲聞亦復然, 汝今為施誰? 速說決所疑。」

爾時,樹神以偈難言:

「如來常飯食, 聲聞亦復然, 堅固欲出家, 不應作妄語, 應當捨虛偽, 諂曲非清淨。 若人越一法, 是即為妄語, 不度於他世, 無惡而不造。」

爾時,央掘魔羅以偈答言:

「汝是卑下姓, 今欲何所說? 汝且自觀察, 女人佛所毀,

誰為真實說? 世間誰妄語? 誰世間貪食? 誰世間病死? 大我實功德, 如來悉具足, 眾生不能知, 是則為妄語。 不食而言食, 是則為妄語, 彼尚無出家, 況復受具足? 不知隱覆說, 是則為妄語, 彼尚無出家, 況復受具足? 我不越一法, 而汝越無量, 竦向天中天, 悔除虚妄語。」

爾時,樹神以偈難言:

「汝以何因緣, 說我是卑趣? 未離毘舍遮, 何能知男女?」

爾時,央掘魔羅以偈答言:

「譬如轉輪王, 珍寶莊嚴座, 臭狗暫臥上, 還至不淨處。 汝以卑陋性, 暫遊方便法, 還復處女身, 縱心五欲樂。 汝今應方便, 速捨女狗身, 莫取男女相, 當修空寂法, 修習空法已, 疾得男子性。

爾時,尊者舍利弗、大目犍連,猶如鵝王,以神通力乘虛而來,來 至佛所頂禮佛足却住一面,見央掘魔羅心生隨喜。時大目連以偈歎 言:

「超哉勇慧士, 善修殊勝業, 宜速隨佛去, 出家修淨戒。 與諸梵行者, 乘虛至祇園, 願佛時哀許, 出家受具足。 普令諸世間, 一切共瞻仰, 陵虛猶鵝王, 明淨如滿月。」

爾時,央掘魔羅以偈問曰:

「云何世神通? 云何神通本? 神力第一尊, 速說斷我疑。」

爾時,大目犍連以偈答言:

「若人修淨捨, 常施履屣乘, 比丘持淨戒, 遠離不習近, 如是二因緣, 疾獲神通力。」

爾時,央掘魔羅復說偈言:

「嗚呼大目連, 修習蚊蚋行, 不能分別知, 第一真實通, 蚊蚋乘虚來, 無知官默然。 常行自他利, 願速安眾生, 如是修方便, 疾獲上神通。 安慰說法者, 或時漕苦難, 捨身為救護, 疾獲上神通。 我今當速行, 廣度諸群生, 至于祇陀林, 當得大神通。 如是無限量, 所謂摩訶衍, 無量復無邊, 所謂諸如來。」

爾時,央掘魔羅說此偈已,即復說偈問舍利弗言:

「云何舍利弗, 世間大智慧, 智慧從何生? 速說決所疑。」

爾時,舍利弗,以偈答言:

「善護持五戒, 能成大智慧, 命終更受身, 智慧常俱生, 名聞遠流布, 智慧不傾動。」

爾時,央掘魔羅復說偈言:

「佛說常不滅, 從是生大慧, 佛說大智慧, 從是說法生。 嗚呼舍利弗, 修習蚊蚋行, 不能分別知, 真實智慧義, 陋哉蚊蚋慧, 無知宜默然。」

爾時,尊者阿難來詣佛所,頂禮佛足却住一面,見央掘魔羅心生隨喜,以偈歎言:

「善哉央掘魔! 已修殊勝業, 我今發隨喜, 速通九部經。」

爾時,央掘魔羅以偈問言:

「如來稱歎汝, 多聞最第一。 云何世多聞, 多聞從何生?」

爾時,阿難以偈答言:

「誦習九部經, 離慳為人說, 從是獲多聞, 總持不思議。」

爾時,央掘魔羅復說偈言:

「歎說諸如來, 畢竟常不滅, 是名為世間, 第一最多聞。 嗚呼阿難陀, 修習蚊蚋行, 不能分別知, 多聞所入聞, 陋哉蚊蚋持, 無知宜默然。」

爾時,尊者羅睺羅來詣佛所,頂禮佛足却住一面,見央掘魔羅心生 隨喜,以偈歎言:

「善哉央掘魔! 已修勝功德, 我今發隨喜, 敬戒速受持。」

爾時,央掘魔羅以偈問言:

「如來稱歎汝, 恭敬戒第一。 云何為世間, 恭敬於淨戒? 汝是佛愛子, 速說決我疑。」

爾時,羅睺羅以偈答言:

「一切佛所說, 專心恭敬持, 是則為世間, 第一恭敬戒。」

爾時,央掘魔羅復說偈言:

「若說諸如來, 世間第一常, 是名為世間, 最上恭敬戒。 嗚呼羅睺羅! 修習蚊蚋行, 不能知第一, 真實恭敬戒, 陋哉蚊蚋敬, 無知宜默然。」

爾時,尊者阿那律來詣佛所,頂禮佛足却住一面,見央掘魔羅心生 隨喜,以偈歎言:

「奇哉央掘魔! 善修殊勝業, 我今發隨喜, 不久得天眼。」

爾時,央掘魔羅以偈問言:

「如來稱歎汝, 天眼最第一。 云何世天眼, 天眼云何生? 汝今當速說, 決斷我所疑。」

爾時,阿那律以偈答言:

「常好施燈明, 說法<mark>開</mark>化人, 由是獲天眼, 洞視無障礙。」

爾時,央掘魔羅復說偈言:

「如來深法藏,精勤方便說, 顯示不隱覆,究竟最勝眼。 嗚呼阿那律,修習蚊蚋行, 不能知出生, 天眼勝方便, 陋哉蚊蚋眼, 無知宜默然。」

爾時,尊者沙門陀娑來詣佛所,頂禮佛足却住一面,見央掘魔羅心生隨喜,以偈歎言:

「奇哉央掘魔! 善修殊勝業, 我今發隨喜, 官應修忍辱。」

爾時,央掘魔羅以偈問言:

「云何為世間, 成就第一忍? 云何生忍辱? 速說決所疑。」

爾時,沙門陀娑以偈答言:

「栴檀塗右臂, 利刀斬左手, 等心不傾動, 能生最上忍, 是則名世間, 堪忍上調伏。」

爾時,央掘魔羅復說偈言:

「若說如來藏, 顯示諸世間, 無知惡邪見, 捨我須無我, 言是佛正法, 聞彼說不怖。 離慢捨身命, 廣說如來藏, 是名為世間, 堪忍上調伏。 嗚呼沙門陀! 修習蚊蚋行, 不能知出生, 最上忍方便。 蚊蚋亦堪耐, 饑渴寒熱苦, 陋哉蚊蚋忍, 無知宜默然。」

爾時,尊者滿願子來詣佛所,頂禮佛足却住一面,見央掘魔羅心大歡喜,以偈歎言:

「善哉修勝業, 我今發隨喜, 為一切眾生, 安慰演說法。」

爾時,央掘魔羅以偈問言:

「如來稱歎汝, 說法中第一。 云何說法者? 云何為知義? 唯願說法上, 時為決所疑。」

爾時,滿願子以偈答言:

「諸佛及聲聞, 聖所不得法, 正覺善通達, 廣為眾生說。

「此說有何義?調過去一切諸佛,於一切法中極方便求,不得眾生界及我人壽命,現在未來一切諸佛及三世一切聲聞緣覺,於一切法中極方便求亦悉不得,我亦如是為眾生說,離眾生界我人壽命,說無我法說空法,如是說法。」

爾時,央掘魔羅謂滿願子言:「嗚呼滿願!修蚊蚋行不知說法。哀哉蚊蚋無知默然,不知如來隱覆之說,謂法無我,墮愚癡燈如蛾投火。諸佛如來所不得者,謂過去一切諸佛世尊,於一切眾生所極方便求無如來藏不可得;現在一切諸佛世尊,於一切眾生所極方便求無我性不可得;未來一切諸佛世尊,於一切眾生所極方便求無自性不可得;三世一切聲聞緣覺,於一切眾生所極方便求無如來藏亦不可得。此是如來偈之正義。

「復次,諸佛如來所不得者,謂過去一切諸佛世尊,於一切法極方 便求世間之我,如拇指粳米麻麥芥子,青黃赤白方圓長短,如是等 比種種相貌。或言:『在心,或臍上下。』或言:『頭目及諸身 分。』或言:『遍身猶如津液。』如是無量種種妄想,如世俗修 我,亦言:『常住安樂蘇息。』如是比我一切諸佛及聲聞緣覺,悉 皆不得正覺彼法為眾生說,此是如來偈之正義,非如汝向妄想所 說。

「復次,諸佛如來所不得者,謂過去一切諸佛世尊,極方便求如來之藏作不可得,如來性是無作,於一切眾生中無量相好清淨莊嚴;現在一切諸佛世尊,極方便求如來之藏作不可得,如來性是無作,於一切眾生中無量相好清淨莊嚴;未來一切諸佛世尊,極方便求如來之藏作不可得,無作是如來性,於一切眾生中無量相好清淨莊嚴。三世一切聲聞緣覺,有如來藏而眼不見,應說因緣。如羅睺羅敬重戒故,極視淨水見蟲不了,為是蟲、為非蟲、為是微塵耶?久久諦觀漸見細蟲。十地菩薩亦復如是,於自身中觀察自性,起如是如是無量諸性種種異見,如來之藏如是難入,安慰說者亦復甚難,謂於惡世極熾然時,不惜身命而為眾生說如來藏,是故我說諸菩薩摩訶薩人中之雄即是如來。如阿那律天眼第一,真實明見空中鳥跡,與肉眼者俱共遊行,彼肉眼者所不能見,信阿那律知有鳥跡,肉眼愚夫聲聞緣覺,信佛經說有如來藏,云何能見佛境界性?聲聞緣覺尚由他信,云何生盲凡夫而能自知不從他受?

「我聞先佛稱說此地,於劫初時有四種味,彼時眾生食四味者于今食土,以久習故今猶不捨。曾於過去諸如來所修如來藏者,亦復如是,久修習故,今猶信樂長夜修習報如來恩。又於未來說法者所聞如來藏,聞已信樂,如彼食土,非餘眾生,彼信樂者,是如來子報如來恩。譬如鷍鳥從久遠來無有慚愧不報恩養,以宿習故今猶不捨。彼諸眾生亦復如是,過去世時無有慚愧,已無慚愧,今無慚

愧、當無慚愧,聞如來藏不生信樂,已不信樂,今不信樂、當不信 樂。譬如猨猴形極醜陋,常多驚怖其心躁動如水涌波,以宿習故今 猶不息。彼諸眾生亦復如是,去來現在心常輕躁,聞如來藏不生信 樂,如鵄鵂鳥晝盲夜見好闇惡明。彼諸眾生亦復如是,好邪惡正不 樂見佛及如來藏,去來現在不生信樂,如彼鵄鵂好闇惡明。如人長 夜修習邪見,染諸外道不正之說,以宿習故今猶不捨。彼諸眾生亦 復如是,久習無我隱覆之教,如彼凡愚染諸邪說,去來現在不解密 教, 聞如來藏不生信樂非餘眾生。若人過去曾值諸佛, 供養奉事聞 如來藏,於彈指頃暫得聽受,緣是善業諸根純熟,所生殊勝富貴自 在,是諸眾生今猶純熟,所生殊勝富貴自在。由彼往昔曾值諸佛蹔 得聽聞如來藏故,於未來世聞如來藏,當復信樂如說修行,諸根純 熟富貴自在,色力具足智慧明達,梵音清淨莫不愛樂,或作轉輪聖 王,或為王子,或為大臣,賢德具足離諸慢恣,降伏睡眠精勤修學 無諸放逸,及餘功德悉皆成就;或為釋梵護世四王,斯由曾聞如來 之藏功德所致,身常安隱無病無惱,壽命延長人所愛敬,具足聽聞 如來常住大般涅槃甘露之法,堅固安隱久住世間,隨順世間而共娛 樂。知諸如來不從欲生,廣為世間開示演說,以此智慧功德利益, 在所生處子孫眾多父母長壽,常受人天一切快樂,族姓殊勝悉皆具 足,斯由聞知一切眾生悉有如來常住藏故。未來現在天上人中,一 切快樂常得具足,由聞如來常住藏故。若彼眾生去來現在,於五趣 中支節不具,輪轉牛死受一切苦,斯由輕慢如來藏故。若諸眾生歷 事諸佛親近供養,乃能得聞如來之藏,信樂聽受不起誹謗,若能如 實安慰說者,當知是人即是如來。若諸眾生多背諸佛者,聞如來藏 則生誹謗,彼諸眾生自燒種子。嗚呼!苦哉!苦哉!不信之人於三 世中甚可哀愍。

「諸說法者,應如是說,稱揚如來常住真實。若說法者不如是說, 是則棄捨如來之藏,是人不應處師子座,如旃陀羅不應服乘大王御 象。一切諸佛極方便求如來之藏生不可得,不生是佛性,於一切眾

生所,無量相好清淨莊嚴。一切諸佛極方便求自性不實不可得,直 實性是佛性,於一切眾生所,無量相好清淨莊嚴。一切諸佛極方便 求自性無常不可得,常性是佛性,於一切眾生所,無量相好清淨莊 嚴。一切諸佛極方便求如來之藏無恒不可得,恒性是佛性,於一切 眾生所無量相好清淨莊嚴。一切諸佛極方便求如來之藏變易不可 得,不變易性是佛性,於一切眾生所無量相好清淨莊嚴。一切諸佛 極方便求如來之藏不寂靜不可得,寂靜性是佛性,於一切眾生所無 量相好清淨莊嚴。一切諸佛極方便求如來之藏壞不可得,不壞性是 佛性,於一切眾生所無量相好清淨莊嚴。一切諸佛極方便求如來之 藏破不可得,不破性是佛性,於一切眾生所無量相好清淨莊嚴。一 切諸佛極方便求如來之藏病不可得,無病性是佛性,於一切眾生所 無量相好清淨莊嚴。一切諸佛極方便求如來之藏老死不可得,不老 死性是佛性,於一切眾生所無量相好清淨莊嚴,一切諸佛極方便求 如來之藏垢不可得,無垢性是佛性,於一切眾生所無量相好清淨莊 嚴。如油雜水不可得,如是無量煩惱覆如來性,佛性雜煩惱者無有 是處,而是佛性煩惱中住。如瓶中燈瓶破則現,瓶者謂煩惱,燈者 謂如來藏,說如來藏者,或是如來或是菩薩或是聲聞,能演說者隨 其所堪,或有煩惱或無煩惱,滿願當知。我說是人即是正覺,能破 受者億煩惱瓶,然後則能自見其性,猶如掌中見阿摩勒果。譬如日 月密雲所覆光明不現,雲翳既除光明顯照。如來之藏亦復如是,煩 惱所覆性不明顯,出離煩惱大明普照,佛性明淨猶如日月。哀哉滿 願,修蚊蚋行不知說法,官嘿疾去。」

「善哉央掘魔! 已修殊勝業, 官應方便求, 如來妙色身。」

爾時,央掘魔羅以偈問言:

「世尊稱歎汝, 端政最第一。 云何為世間, 端政最殊特? 何因得端政? 時說決所疑。」

爾時, 孫陀羅難陀以偈答言:

「澡手合十指, 頂禮佛舍利, 常供養病人, 從是致端政。」

爾時,央掘魔羅復說偈言:

「佛身無筋骨, 云何有舍利? 如來離舍利, 勝方便法身。 如來不思議, 未信令信樂, 故以巧方便, 示現有舍利, 方便留舍利, 是則諸佛法。 世間從本來, 供養梵自在, 天子及天女, 種種諸形像, 以彼非歸依, 建立舍利塔。 若有諸眾生, 解知是方便, 因此方便智, 獲致端政色。 非如汝先說, 妄想端政因。 嗚呼孫陀羅, 不知妙色門, 蚊蚋色具足, 無知官默然。」

爾時,尊者優波離來詣佛所,稽首佛足却住一面,見央掘魔羅心生 隨喜,以偈歎言:

「奇哉央掘魔! 已修殊勝業, 我今發隨喜, 汝當修淨律。」

爾時,央掘魔羅以偈問言:

「如來稱歎汝, 持律中第一。 云何善持律? 速說決所疑。」

爾時,優波離,以偈答言:

「一切惡莫作, 諸善悉奉行, 方便修淨心, 是則善持律。」

爾時,央掘魔羅復說偈言:

「壞法毀禁戒, 非律惡比丘, 應當奪六物, 一切資生具, 逼迫加罰黜, 方便令調伏, 斯非破戒物。 梵行所應用, 譬如大國王, 所寶護身刀, 法應強奪取, 若在屠膾舍, 帝王所珍器, 不應屬惡人。 如是梵行者, 所應受畜物, 不屬壞法人, 是故還攝取, 第一善持律。 是則名世間, 不犯突吉羅, 亦非非威儀, 如是持律者, 具足如來教。 如來視一切, 猶如羅睺羅, 嗚呼優波離, 修習蚊蚋行, 不解善持律, 無知官默然。」

爾時,文殊師利法王子來詣佛所,稽首佛足却住一面,見央掘魔羅心生隨喜,以偈歎言:

「善哉央掘魔! 已修殊勝業, 今當修大空, 諸法無所有。」

爾時,央掘魔羅以偈問言:

「文殊法王子! 汝見空第一。 云何為世間, 善見空寂法? 空空有何義? 時說決所疑。」

爾時, 文殊師利以偈答言:

「諸佛如虚空, 虚空無有相, 諸佛如虚空, 虚空無生相, 諸佛如虚空, 虚空無色相。 法猶如虚空, 如來妙法身, 如來大智身。 智慧如虚空, 如來無礙智, 不執不可觸, 解脫如虚空, 虚空無有相。 空寂無所有。 解脫則如來, 汝央掘魔羅, 云何能了知?」

爾時, 央掘魔羅復說偈言:

「譬如有愚夫, 見雹牛妄想, 謂是琉璃珠, 取已執持歸, 置之瓶器中, 守護如真寶, 空想默然住。 不久悉融消, 亦復作空想, 於餘真琉璃, 文殊亦如是, 修習極空寂, 常作空思惟, 破壞一切法, 而作極空想。 解脫實不空, 猶如見雹消, 濫壞餘真實, 汝今亦如是, 濫起極空想。 見於空法已, 不空亦謂空, 有異法是空, 有異法不空。 譬如彼雨雹, 一切諸煩惱, 一切不善壞, 猶如雹融消。 如直琉璃寶, 謂如來常住, 如直琉璃寶, 謂是佛解脫。 虚空色是佛, 非色是二乘, 解脫色是佛, 非色是二乘, 云何極空相, 而言真解脫? 文殊官諦思, 莫不分別想。 譬如空聚落, 川竭瓶無水, 非無彼諸器, 中虚故名空。 不空亦如是, 如來直解脫, 出離一切過, 故說解脫空。 如來實不空, 離一切煩惱, 及諸天人陰, 是故說名空。

嗚呼蚊蚋行, 不知真空義, 外道亦修空, 尼乾宜默然。」

爾時, 文殊師利以偈問言:

「汝央掘魔羅! 以何因緣故? 恐迫聲聞眾, 輕蔑諸佛子, 縱意<mark>肆</mark>兇暴, 虓譀如猛虎, 誰是蚊蚋行, 出是惡音聲?」

爾時,央掘魔羅以偈答曰:

「譬如貧怯十, 游行曠野中, 卒聞猛虎氣, 恐怖急馳走。 聲閏緣覺人, 不知摩訶衍, 趣聞菩薩香, 恐怖亦如是。 譬如師子王, 處在山巖中, 游步縱鳴吼, 餘獸悉恐怖。 如是人中雄, 菩薩師子吼, 一切聲聞眾, 及諸緣覺獸, 長夜習無我, 設我野干鳴, 一切莫能報, 况復能聽聞, 無等師子吼?」

爾時, 文殊師利以偈問言:

「汝是小蚊蚋, 興造<mark>諸</mark>惡行, 如汝是菩薩, 何處更有魔? 嗚呼世間人, 不能自覺知, 不自省己過, 但見他人惡。 汝央掘魔羅! 為作幾許罪?」

爾時,央掘魔羅以偈答言:

「嗚呼今世人, 二人壞正法, 謂說唯極空, 或復說有我。 如是二種人, 傾覆佛正法,

```
嗚呼汝文殊,
        不知惡非惡。
不知菩薩行,
        蚊蚋師子異,
奇哉我能知,
        無畏諸菩薩。
文殊今諦聽,
        佛歎菩薩行。
譬如善幻師,
        造作諸幻業,
        以示諸大眾。
斷截食眾生,
諸佛及菩薩,
        所作皆如幻,
示現變自身,
        若牛若涅槃。
或於疾疫劫,
        施身令服食,
或見作火劫,
        大地 悉洞然,
眾生有常想,
        示令知無常。
或於刀兵劫,
        示現加師旅,
殘賊斷眾命,
        其數不可量,
而實無惱害,
        猶如幻所作。
        令入芥子中,
一切三千界,
而無一眾生,
        惱逼不安隱,
四海須彌山,
        同入一毛孔,
一切無惱逼,
        現已還本處。
或以一足指,
        震動十方界,
        是則諸佛法。
而不惱眾生,
或為梵釋主,
        護世四天王,
無量眾像類,
        安慰諸群牛。
王子若大臣,
        聚落商人主,
長者及居士,
        和合安眾生,
或為諸天人,
        轉化眾邪見,
現生一切生,
        故名為本生。
譬如造幻師,
        見殺幻眾生,
曾不起悲歎,
        嗚呼是大惡,
以彼工幻師,
        解是幻性故。
        現殺化眾生,
我今亦如是,
為調諸毀法,
        而實無所傷。
        化現刀兵劫,
如彼佛世尊,
我今亦如是,
        善修菩薩行。
嗚呼汝文殊!
        修習蚊蚋行,
而不志龍象,
        世雄大智慧。」
```

爾時,世尊以一切智一切見,向文殊師利,以偈歎言:

「如央掘魔說, 菩薩行如是, 當知彼非凡, 為度眾生故。 彼則大菩薩, 雄猛如汝等, 善哉汝文殊! 當知彼功德。」

佛說是已,以偈歎言:

「善哉巧方便, 殊勝人中雄, 安慰眾生故, 現大精進力。 我今當演說, 欲成阿羅漢, 如是諸功德, 善業及精進, 令一切眾生, 究竟永安樂。」

爾時,舍利弗白佛言:「世尊!唯願哀愍一切眾生,為我演說,將欲疾成阿羅漢者,以何功德。何業。何精進,饒益安樂一切眾生?」

爾時,世尊以偈答言:

「父母和合時, 子來入母胎, 父母心歡喜, 得隨順功德。 異精進光澤, 世間極豐壤, 王得極快樂, 母致殊勝夢。 子生家巨富, 怨敵悉慈心, 師徒無違諍, 七歲入學堂, 僕使皆歡喜, 各勤修家業。 至年滿二十, 六畜悉無諍, 相視如父母, 香乳皆盈溢。 大哉賢明子, 無貪瞋嫉慢, 諂曲及虚偽, 過言加惱害。 小兒不威儀, 眾惡不善業, 慈孝供二親, 諸尊及師保。 若見諸耆長, 合掌致恭敬, 懷納諸中年, 幼則同遊戲。 子愛諸苦人, 施敬善周急, 常慕修正法。 誠惡知慚愧, 不習戲幻術, 常樂見諸佛,

務誦諸經律, 善學諸明處。 恭敬諸最勝, 遠洒離博弈, 眠食知止足, 不樂諸不淨。 天人所愛念, 一切悉欣敬, 無量不可譬。 如是大功德, 是將成下覺, 功德業精進。 舍利弗當知, 是央掘魔羅, 當疾成正覺。 有如是像類, 云何如是人, 當復有諸惡, 彼更有無量, 奇特諸功德。 雄傑如文殊, 超絕非常類, 視一切眾生, **猶如一子想。** 當知央掘魔! 菩薩摩訶薩, 誓度諸未度, 世間是我有, 若欲發勝願, 普濟諸世間, 而作不善行, 則無有是處。」

爾時,世尊復說偈言:

「現作日月天, 梵王眾生主, 地水火風空, 如是無量德, 菩薩人中雄, 以此度眾生。」

爾時,大目犍連以偈歎言:

「奇哉央掘魔! 如是大功德, 暫見佛世尊, 超度一切有。」

爾時,央掘魔羅以偈答言:

「云何大目連, 頗有諸眾生, 不見佛世尊, 能知正法耶?」

爾時,大目犍連,以偈答言:

「如佛世尊說, 病人有三種, 云何名為三? 邪正定不定。

云何為邪定? 謂佛不能化。 云何為正定? 謂大迦葉等。 如來未出世, 依佛入實法。」

爾時,央掘魔羅復說偈言:

「汝莫作是說, 上座大迦葉, 能入真實法。 如來未出世, 所以然者何? 如來常住世, 若人依正法, 佛常住其舍。 譬如雨河流, 無雨亦水流, 智者巧方便, 應當善觀察。 無雨河水流, 終無有是處, 是故流不絕。 當知上有雨, 如是大目連, 世間出世間, 一切諸勝法, 斯皆從佛流, 是故大迦葉, 依佛得出家。」

爾時,大目連以偈問言:

「若有諸如來, 常住於世間, 我及餘眾生, 何故此不見?」

爾時,央掘魔羅以偈答言:

「但令迦葉知, 猶如餘處雨, 是故世無佛, 眾牛不自度, 面覩諸如來, 然後得解脫。 譬如有士夫, 入於闇室禪, 日月光來照, 而彼不覩見。 如是大目連, 莫言世無佛, 一切諸如來, 常住於世間, 濟度諸群生, 出家受具足。 是故唯邪正, 無有不定聚。」

爾時,大目連以偈問言:

「世間有五戒, 佛出世亦然。」

爾時,央掘魔羅以偈答言:

「乃至世間有, 隨順戒威儀, 世間出世間, 當知皆佛說。」

爾時,大月連以傷問言:

「云何世間病, 分別說三種? 或有醫治差, 或不得醫差, 或復有病人, 雖得醫不差, 是故諸病人, 分別有三種。」

爾時,央掘魔羅以偈答言:

「是義則不然, 不應說三種, 可治不可治, 唯二無有三。 若作三分别, 亦是聲聞乘, 若諸聲閏乘, 佛說蚊蚋乘, 以彼無知故, 分別有三種。 所言邪定者, 謂彼一闡提, 菩薩及二乘。 正定謂如來, 目連應當知, 二種甚希有, 所謂佛世尊, 及與一闡提。 如來最上處, 於上更無餘, 第一極卑鄙, 所謂一闡提。 滿十波羅蜜, 譬如大菩薩, 闡提亦如是, 具足十惡行。 菩薩捨身施, 頭目血髓腦, 積骨踰須彌, 過是不可數。 闡提亦如是, 具足惡行施, 貪欲極熾然, 生於餓鬼趣, 念念貪欲心, 眾多女人應, 亦生眾多子, 長夜不得樂, 還自食其子。 飢渴苦所逼, 復有餘餓鬼, 變作婆羅門,

宿世惡業緣, 來從索子食, 即施恣所欲, 或復自食身, 如是一闡提, 惡行得滿足。 是故佛世尊, 無上處希有, 所謂一闡提。 邪定是闡提, 正定是如來, 住地諸菩薩, 及聲聞緣覺。」

爾時,世尊向央掘魔羅,而說偈言:

「汝來央掘魔, 出家受三歸。」

爾時,央掘魔羅以偈答言:

「此乘是大乘, 說名無礙智, 一乘一歸依, 佛第一義依。 佛法是一義, 如來妙法身, 僧者說如來, 如來即是僧。 二是方便依, 法及比丘僧, 如來非方便, 是第一義依。 是故我今日, 歸依於如來, 於諸歸依中, 如來真實依。 如欲食興蕖, 應當取直實, 捨真食虛偽, 自他無利益, 如是愚癡人, 千醫莫能救。 如是捨一依, 修習方便依, 千佛不能救。」 是則群癡眾,

爾時,世尊告央掘魔羅:「汝當受持童真淨戒。」(童真是沙彌別名; 戒,梵本云式叉。式叉,宋言學亦言隨順無違)

爾時,央掘魔羅以偈問言:

「云何為童真? 云何具足戒? 云何真沙門? 云何為福田?」

爾時,世尊默然而住。

央掘魔羅復說偈言:

「若不知一依, 是第一義依, 不能知二依, 方便所建立, 當知如是人, 是世間童真。 未受具足戒, 云何是沙門? 不知一歸依, 云何淨歸依? 若不知如來, 是第一義依, 云何為沙門? 不清淨歸依, 不知真實依, 云何為福田? 於是二歸依, 真實及方便, 不善知差別, 是則世童真。」

爾時,世尊告央掘魔羅:「汝當受持不殺生戒。」

央掘魔羅以偈答言:

「我今定不能, 受持不殺戒, 我當常受持, 斷絕眾生命。 所言眾生者, 無量諸煩惱, 若能常害彼, 是名持殺戒。」

爾時,世尊復告之言:「汝當受持不妄語戒。」

央掘魔羅以偈答言:

「我今定不能, 受持不妄語, 党持妄說句。 受持虛妄說, 是則諸佛法。 是則諸佛法空, 是則諸法空, 質間及緣覺。 它有虛妄法, 它有虛妄法, 它有虛妄法, 復有虛妄法, 復有虛妄法, 後則正則。 後則不可疑。 後則不可疑其。 是可能, 。 是可能,

或往來經行, 九道流諸漏。 我受用革屣, 楊枝及服藥, 飢渴或睡眠, 剪爪剃鬚髮。 身中種種患, 隨病服諸藥, 如薪盡火滅。 我當般涅槃, 如是等一切, 諸餘虚偽法, 周行於世間, 乃至我方便, 常於爾所時, 不淨此妄語。 今說實及諦, 日連官善聽。 若實若諦者, 所謂如來藏, 第一義常身, 佛不思議身, 第一不變易, 恒身亦復然, 妙法身真實, 第一義靜身, 如是不思議, 彼身云何現? 是故偽法生, 則是諸佛教, 離一切虛偽, 是故說名佛。 譬如牧牛人, 犢子若死時, 取皮覆餘犢, 悦母令歡喜。 如來亦如是, 隨順世間行。 若於聾人中, 示現作 聲像, 如彼牧牛者, 而為彼說法, 眾生作是念, 如來同世間。 如彼牧牛者, 無量諸像類, 種種巧方便, 引導諸群牛。 若彼牧牛人, 示餘直犢子, 彼乳則不下, 是故設方便。 如來亦如是, 若現自性身, 一切諸世間, 其誰堪任見? 故以巧方便, 示現 隨世間, 普令得解脫, 是則諸佛法。 是故我從今, 常行虚偽事, 乃至殺眾生, 一切虚妄際, 不受離虚妄, 則我戒清淨。」

爾時,世尊告央掘魔羅:「汝今當受不飲酒戒。」

央掘魔羅以偈答言:

「我今亦不能, 受持不飲酒。 常受飲酒戒, 長夜恒縱逸, 由是大<mark>叫</mark>呼, 宛轉遍五道, 一向極快樂, 是則名為酒。 從彼大乘生, 無上佛藏酒, 是酒我今飲, 自足勸眾生。 常住不變易, 歡喜歎善哉, 八聲大宣唱, 酣醉無終極。」

爾時,世尊告央掘魔羅:「汝今當受不婬淨戒。」

央掘魔羅以偈答言:

「我今亦不能, 受持不婬戒。 我當常受持, 貪著他所愛, 與彼相娛樂。 恒游婬女舍, 三昧樂為妻, 直諦法為子, 慈悲心為女, 以空為舍宅, 以為高廣床, 無量波羅密, 侍衛諸煩惱, 隱覆說為食, 總持為園苑, 七覺華莊嚴, 法語為林樹, 解脫智為菓, 是等名世間, 第一勝娛樂, 慧者自性法, 非是愚境界。」

爾時,世尊告央掘魔羅:「汝今當受離不與取戒。」

央掘魔羅以偈答言:

「我今亦不能, 受持不盜戒。 常受不與取, 劫盜他財物, 不與者菩提, 無有授與者, 不與而自取, 故我不與取。 佛坐菩提樹, 不得亦不失, 此是自性法, 最勝無有上。」

爾時,佛告央掘魔羅:「汝今當受不歌舞戒。」

央掘魔羅以偈答言:

「我常習舞樂, 歌乾闥婆偈, 宣示如來藏, 嗟歎稱善哉。 於彼諸佛所, 聞如來常住, 恒以妙音誦, 大乘修多羅。 猶如緊那羅, 乾闥婆伎樂, 無量眾妙音, 供養諸經卷。 若彼諸眾生, 常興是供養, 諸佛悉授記, 未來同一號。」

央掘魔羅經卷第二

央掘魔羅經卷第三

宋天竺三藏求那跋陀羅譯

爾時,佛告央掘魔羅:「云何為一學?」

央掘魔羅以偈答言:(學,梵本云式叉。式叉譯言隨順無違亦云學,即今所謂 戒也)

「一切眾生命, 皆由飲食住, 是則聲聞乘, 斯非摩訶衍, 離食常堅固。 所謂摩訶衍, 云何名為一? 謂一切眾生, 畢竟恒安住。 皆以如來藏, 云何名為二? 所謂名與色, 是則聲聞乘, 斯非摩訶衍。 名及色異種, 聲聞緣覺乘, 解脫唯有名, 不說有妙色。 一切諸如來, 解脫有妙色, 猶如於掌中, 觀察養羅果。 云何名為三? 所謂三種受, 是則聲聞乘, 斯非摩訶衍。 如來第一常, 聞無常牛受, 是二俱受生, 若聞法僧滅, 是名摩訶衍, 所說三受義。 所謂四聖諦, 云何名為四? 是則聲聞乘, 斯非摩訶衍。 一切諸如來, 第一畢竟常, 是則大乘諦, 非苦是真諦。 第一畢竟恒, 一切諸如來, 是則大乘諦, 非集是直諦。 一切諸如來, 第一不變易, 是則大乘諦, 非滅是真諦。 一切諸如來, 第一畢竟靜, 是則大乘諦, 非道是直諦。 是大乘四諦, 非苦事是諦,

四趣應有諦, 若苦事是諦, 謂地獄畜生, 餓鬼阿修羅。 云何名為五? 所謂彼五根, 是則聲聞乘, 斯非摩訶衍。 所謂彼眼根, 於諸如來常, 決定分明見, 具足無減修。 所謂彼耳根, 於諸如來常, 具足無減修。 決定分明聞, 所謂彼鼻根, 於諸如來常, 決定分明齅, 具足無減修。 所謂彼舌根, 於諸如來常, 決定分明嘗, 具足無減修。 所謂彼身根, 於諸如來常, 具足無減修。 決定分明觸, 云何名為六? 所謂六入處, 斯非摩訶衍。 是則聲聞乘, 於諸如來常, 所謂眼入處, 明見來入門, 具足無減修。 所謂耳入處, 於諸如來常, 明閏來入門, 具足無減修。 所謂鼻入處, 於諸如來常, 明齅來入門, 具足無減修。 所謂舌入處, 於諸如來常, 明嘗來入門, 具足無減修。 所謂身入處, 於諸如來常, 明觸來入門, 具足無減修。 所謂意入處, 明說如來藏, 不起違逆心, 淨信來入門。 云何名為七? 所謂七覺分, 是則聲聞乘, 斯非摩訶衍。 大乘七覺分, 猶如優曇鉢, 於如來常住, 七覺妙花開。 所謂八聖道, 云何名為八? 是則聲聞乘, 斯非摩訶衍。 大乘八聖道, 聞說如來常, 經耳因緣力, 終到涅槃城。 如來常及恒, 第一不變易, 清淨極寂靜, 正覺妙法身。

甚深如來藏, 畢竟無衰老, 是則摩訶衍, 具足八聖道。 云何名為九? 所謂力部經, 是則聲聞乘, 斯非摩訶衍。 摩訶衍一乘, 如來無礙智。 云何名為十? 所謂十種力, 是則聲閏乘, 斯非摩訶衍。 大乘無量力, 故佛不思議, 方便隱覆說, 無量修多羅。 云何為一道? 一乘及一歸, 一諦與一依, 一界亦一生, 一色謂如來, 是故說一乘, 唯一究竟乘, 餘悉是方便。」

爾時,世尊歎言:「善哉善哉!央掘魔羅!汝來比丘。」即成沙門,威儀具足如舊比丘。

爾時,央掘魔羅稽首佛足白佛言:「世尊!我今已來尋聲即得阿羅漢果。」

佛又告言:「汝來祇陀林廣度眾生也。」爾時,世尊猶如鴈王,與 央掘魔羅、舍利弗、大目連、文殊師利等大眾翼從,如盛滿月眾星 圍繞,從無憂樹下上昇虛空,去地七多羅樹,至舍衛城四十牛鳴。 爾時,央掘魔羅母,與諸天、龍、夜叉、乾闥婆、緊那羅、摩睺羅 伽,興大供養到祇陀林。爾時,世尊猶如鴈王,入祇陀林給孤獨園 昇師子座,三千大千世界地平如掌,生柔軟草如安樂國。

爾時,一切諸方諸大菩薩,悉皆欲來見央掘魔羅,諸佛即遣而告之曰:「汝等應去。今釋迦牟尼佛興大法戰,降大師子度無量眾,今於祇樹給孤獨園,當為大眾說無上法。汝等佛子!應往聽受并復瞻覩央掘魔羅。」彼諸菩薩從諸方來者,皆雨蓮華大如車輪,此諸眾生聞蓮華香悉離煩惱。

爾時,天、龍、夜叉、乾闥婆、阿修羅、緊那羅、摩睺羅伽及諸天女,設天供養雨種種寶,一心同聲而說偈言:

「我今稽首禮, 四八大人相, 無量諸功德, 如淨蓮花敷。 眉間白毫相, 明淨踰月光, 牟尼上妙色。 我今稽首禮, 勝慈安慰德, 如淨蓮花敷, 眉間白毫相, 明淨踰月光。 我今稽首禮, 第一常住身, 最勝牟尼主, 無上天人尊。 安慰眾生上, 如淨蓮花敷, 眉間白毫相, 明淨踰月光。 第一恒功德, 我今稽首禮, 無上天人尊。 最勝牟尼主, 安慰眾生上, 如淨蓮花敷, 眉間白臺相, 明淨踰月光。 我今稽首禮, 不變易功德, 最勝牟尼主, 無上天人尊。 安慰眾生上, 如淨蓮花敷, 眉間白毫相, 明淨踰月光。 我今稽首禮, 寂靜殊勝德, 最勝牟尼主, 無上天人尊。 安慰眾生上, 如淨蓮花敷, 眉間白毫相, 明淨踰月光。 忍辱修淨戒, 南無央掘魔, 是故稽首禮。 及諸無量德, 執持一乘道, 南無央掘魔, 大乘慈功德, 是故稽首禮。 持無量身口, 南無央掘魔, 持無量祕密, 是故稽首禮。 南無央掘魔, 持無量慧光, 說無量隱覆, 是故稽首禮。 南無央掘魔, 執持無量幻, 是故稽首禮。 降伏無量魔, 南無央掘魔, 持無量涅槃, 順世無量生, 是故稽首禮。」 爾時,央掘魔羅白佛言:「世尊!世尊說言:『我住無生際。』此說有何義?云何世尊住無生際住解脫地,而復住此?誰能信者?願說因緣。」

佛告央掘魔羅:「汝今當與文殊師利俱,至北方過一恒河沙剎,有國名無量樂,佛名無量慧功德積聚地自在王如來、應供、等正覺,在世教化,汝等俱往問彼佛言:『釋迦牟尼如來,云何住無生際,而復住於娑婆世界?』」

爾時,文殊師利、央掘魔羅俱白佛言:「唯然受教。」猶如鴈王乘神通力,往詣北方無量樂國,至無量慧功德積聚地自在王如來所,頂禮佛足白言:「世尊!我等二人為釋迦牟尼世尊所使,從娑婆世界來詣此土,啟問世尊:『云何釋迦牟尼如來,住無生際住解脫地,不般涅槃而住於彼?』」

爾時,彼佛告二人言:「善男子!釋迦牟尼如來即是我身。汝等還去,語彼佛言:『無量慧佛遣我等還。云彼如來當為汝說。』」

爾時,文殊師利等,猶如鴈王從彼而來,頂禮佛足合掌恭敬白言:「世尊奇哉!如來無量,如來無量身,如來無量德,我等二人今見如來奇特功德,彼無量慧自在王如來作是說言:『我即彼佛,當為汝說。』唯願世尊!哀愍敷演,云何住無生際而復住此?」

佛告文殊師利等言:「我云何住無量樂世界,為無量慧功德積聚地 自在王佛,而復住此?莫作是說,住無生際,云何住彼而復住此? 如來身無邊,所為亦無邊,如來不可稱,所為亦不可稱,如來身無 量,所為亦無量。央掘魔羅!云何而生不生之身?以如是義諮問如來,如來今當為汝解說。」

爾時,央掘魔羅白佛言:「善哉世尊!唯願為說,哀愍安樂一切眾生。」

佛告央掘魔羅:「我於無量百千億劫,具足修行十波羅蜜攝取眾生,無量眾生未發菩提心者開化令發,我於無量阿僧祇劫,具足修行無量波羅蜜諸善根故,生不生身。」

爾時,央掘魔羅復白佛言:「世尊!云何如來身住實際而復生耶?」

佛告央掘魔羅:「汝與文殊師利俱,至北方過二恒河沙剎,有國名不實電光鬘,佛名毘樓遮那如來、應供、等正覺,在世教化。汝與文殊師利俱往問言:『釋迦牟尼佛云何住於實際而住娑婆世界?』」爾時,二人受教即行,猶如鴈王陵虛而去,往詣不實電光鬘剎毘樓遮那佛所,稽首禮足,具以上事諮問彼佛。廣說如上,文殊師利央掘魔羅復白佛言:「世尊!唯願為說,云何如來住於實際?」

佛告文殊師利等言:「我於無量百千億劫,具足修行十波羅蜜攝取 眾生,建立令住未曾有樂,我從彼無量百千億劫阿僧祇波羅蜜,生 實際身。」

爾時,央掘魔羅復白佛言:「世尊!云何如來住無為際?」

佛告央掘魔羅:「汝與文殊師利俱,至北方過三恒河沙剎,有國名意取,佛名無量意如來、應供、等正覺,在世教化。汝往問言: 『云何釋迦牟尼佛住無為際?』如上廣說。北方去此過四恒河沙 剎,有國名眾色莊嚴,佛名最勝降伏,餘如上說。北方去此過五恒 河沙剎,有國名深塵,佛名深上,餘如上說。北方去此過六恒河沙 剎,有國名風,佛名如風,餘如上說。北方去此過七恒河沙剎,有 國名龜間意,佛名金剛上,餘如上說。北方去此過八恒河沙剎,有 國名離垢光,佛名離垢上,餘如上說。北方去此過九恒河沙剎,有 國名月主,佛名月上,餘如上說。北方去此過十恒河沙剎,有國名日初出,佛名日初出,餘如上說。

「東方去此過一恒河沙剎,有國名善味,佛名善味上,餘如上說。 東方去此過二恒河沙剎,有國名擊頭耆婆,佛名擊頭耆婆光,餘如 上說。東方去此過三恒河沙剎,有國名多摩羅鉢多羅,佛名多摩羅鉢 多羅清涼香,餘如上說。東方去此過五恒河沙剎,有國名月主,佛 名月藏,餘如上說。東方去此過六恒河沙剎,有國名沈香主,佛名 沈香上,餘如上說。東方去此過七恒河沙剎,有國名末香熏,佛名 沈香上,餘如上說。東方去此過七恒河沙剎,有國名末香熏,佛名 末香,餘如上說。東方去此過八恒河沙剎,有國名明照,佛名光 明,餘如上說。東方去此過九恒河沙剎,有國名海主,佛名海德, 餘如上說。東方去此過九恒河沙剎,有國名海主,佛名海德, 餘如上說,東方去此過十恒河沙剎,有國名龍主,佛名龍藏,餘如 上說。

「南方去此過一恒河沙剎,有國名朱沙,佛名朱沙光,餘如上說。南方去此過二恒河沙剎,有國名電鬘,佛名電得,餘如上說。南方去此過三恒河沙剎,有國名電鬘,佛名電得,餘如上說。南方去此過四恒河沙剎,有國名輪轉,佛名詩輪轉,餘如上說。南方去此過五恒河沙剎,有國名寶地,佛名寶地持,餘如上說。南方去此過七恒河沙剎,有國名虛空慧,佛名虛空等,餘如上說。南方去此過八恒河沙剎,有國名關伏,佛名調伏上,餘如上說。南方去此過11回河沙剎,有國名勝鬘,佛名勝藏,餘如上說。南方去此過十恒河沙剎,有國名師子慧,佛名師子藏,餘如上說。

「西方去此過一恒河沙剎,有國名恬,佛名恬味,餘如上說。西方去此過二恒河沙剎,有國名恒鬘,佛名恒德,餘如上說。西方去此過三恒河沙剎,有國名普賢,佛名普賢慧,餘如上說。西方去此過四恒河沙剎,有國名華鬘,佛名華鬘上,餘如上說。西方去此過五

恒河沙剎,有國名無邊,佛名無邊華鬘,餘如上說。西方去此過六恒河沙剎,有國名賢主,佛名賢藏,餘如上說。西方去此過七恒河沙剎,有國名眼,佛名眼王,餘如上說。西方去此過八恒河沙剎,有國名幢主,佛名幢藏,餘如上說。西方去此過九恒河沙剎,有國名鼓音,佛名鼓自在,餘如上說。西方去此過十恒河沙剎,有國名樂見,佛名樂見上,餘如上說。

「西北方去此過一恒河沙剎,有國名歡喜進,佛名歡喜進,餘如上說。西北方去此過二恒河沙剎,有國名因慧,佛名因慧藏,餘如上說。西北方去此過三恒河沙剎,有國名行意樂,佛名行意樂上,餘如上說。西北方去此過五恒河沙剎,有國名眾生聚,佛名眾生上,餘如上說。西北方去此過六恒河沙剎,有國名聰明,佛名明上,餘如上說。西北方去此過七恒河沙剎,有國名意樂,佛名意樂聲,餘如上說。西北方去此過八恒河沙剎,有國名無量,佛名無量壽,餘如上說。西北方去此過八恒河沙剎,有國名任,佛名安住上,餘如上說。西北方去此過十恒河沙剎,有國名化,佛名安住上,餘如上說。西北方去此過十恒河沙剎,有國名化,佛名水味上,餘如上說。西北方去此過十恒河沙剎,有國名水,佛名水味上,餘如上說。西北方去此過十恒河沙剎,有國名水,佛名水味上,餘如上說。

「東北方去此過一恒河沙剎,有國名寶主,佛名寶幢,餘如上說。 東北方去此過二恒河沙剎,有國名摩尼陀,佛名摩尼清涼藏,餘如 上說。東北方去此過三恒河沙剎,有國名金色,佛名金色光音,餘 如上說。東北方去此過五恒河沙剎,有國名絕,佛名網光,餘如上 說。東北方去此過六恒河沙剎,有國名金主,佛名閻浮檀上,餘如 上說。東北方去此過七恒河沙剎,有國名金主,佛名閻浮檀上,餘如 上說。東北方去此過七恒河沙剎,有國名網,佛名網光,餘如上 說。東北方去此過八恒河沙剎,有國名淨水,佛名水王,餘如上 說。東北方去此過八恒河沙剎,有國名河水,佛名水王,餘如上 說。東北方去此過九恒河沙剎,有國名玉洲,佛名玉藏,餘如上 說。東北方去此過十恒河沙剎,有國名寶洲,佛名寶地,餘如上說。

「東南方去此過一恒河沙剎,有國名金剛積,佛名金剛慧,餘如上說。東南方去此過二恒河沙剎,有國名一切覺,佛名一切覺慧幢,餘如上說。東南方去此過三恒河沙剎,有國名悉檀主,佛名悉檀義勝,餘如上說。東南方去此過四恒河沙剎,有國名無垢,佛名無垢琉璃,餘如上說。東南方去此過五恒河沙剎,有國名香味,佛名不那聚,餘如上說。東南方去此過六恒河沙剎,有國名香主,佛名香藏,餘如上說。東南方去此過七恒河沙剎,有國名香主,佛名香藏,餘如上說。東南方去此過八恒河沙剎,有國名重行,佛名直勝,餘如上說。東南方去此過九恒河沙剎,有國名無價,佛名無價上,餘如上說。東南方去此過十恒河沙剎,有國名無邊周羅,佛名無邊王,餘如上說。

「西南方去此過一恒河沙剎,有國名無量光,佛名無量壽,餘如上說。西南方去此過二恒河沙剎,有國名無量眼,佛名無量自在,餘如上說。西南方去此過三恒河沙剎,有國名壞闇,佛名壞闇王,餘如上說。西南方去此過五恒河沙剎,有國名調伏主,佛名調伏藏,餘如上說。西南方去此過五恒河沙剎,有國名無生,佛名無生自在,餘如上說。西南方去此過七恒河沙剎,有國名香主,佛名香象遊戲,餘如上說。西南方去此過七恒河沙剎,有國名香箧,佛名香篋王,餘如上說。西南方去此過八恒河沙剎,有國名香篋,佛名香篋王,餘如上說。西南方去此過九恒河沙剎,有國名樂讚,佛名龍樂,餘如上說。西南方去此過十恒河沙剎,有國名將豐,佛名勝調伏上,餘如上說。

「上方去此過一恒河沙剎,有國名忍見,佛名一切世間樂見高顯王 神力嚴淨大誓莊嚴地自在王一切光明積聚門,餘如上說。上方去此 過二恒河沙剎,有國名分陀利,佛名妙法分陀利,餘如上說。上方 去此過三恒河沙剎,有國名水笑華,佛名笑華王,餘如上說。上方去此過四恒河沙剎,有國名無憂,佛名離一切憂,餘如上說。上方去此過五恒河沙剎,有國名波頭摩主,佛名波頭摩藏,餘如上說。上方去此過六恒河沙剎,有國名鳩牟陀,佛名鳩牟陀藏,餘如上說。上方去此過七恒河沙剎,有國名竹,佛名竹香,餘如上說。上方去此過九恒河沙剎,有國名拘迦尼,佛名一切勝王,餘如上說。上方去此過九恒河沙剎,有國名均迦尼,佛名一切勝王,餘如上說。上方去此過十恒河沙剎,有國名功德河,佛名一切世間河王自在,餘如上說。

「下方去此過一恒河沙剎,有國名師子積聚,佛名師子遊戲,餘如上說。下方去此過二恒河沙剎,有國名那子窟,佛名師子吼,餘如上說。下方去此過三恒河沙剎,有國名勝,佛名一切生勝,餘如上說。下方去此過五恒河沙剎,有國名無礙積聚,佛號大乘遊戲王,餘如上說。下方去此過六恒河沙剎,有國名頻陀,佛名頻陀山頂,餘如上說。下方去此過七恒河沙剎,有國名尊重難見,佛名一切恭敬王,餘如上說。下方去此過七恒河沙剎,有國名尊重難見,佛名一切恭敬王,餘如上說。下方去此過八恒河沙剎,有國名持慧,佛名持慧王,餘如上說。下方去此過八恒河沙剎,有國名常歡喜王,佛名斷一切疑,在世教化,汝等當往問彼佛言:『云何釋迦牟尼佛住廣說莊嚴際,而住娑婆世界不般涅槃?』汝央掘魔羅與文殊師利俱往詣彼問如是義,彼決一切疑如來當為汝說,以能決斷一切疑故名斷一切疑佛。」

爾時,文殊師利與央掘魔羅俱白佛言:「世尊!善哉善哉!唯然受教。」頂禮佛足,猶如鴈王凌虛而去,至常歡喜王剎,禮斷一切疑如來足,却坐一面白彼佛言:「我等從娑婆世界釋迦牟尼佛所,普詣十方各十世界諸如來所,問如是義:『云何釋迦牟尼佛,住娑婆

世界不般涅槃解脫之際?』彼諸如來悉答我言:『釋迦牟尼佛即我等身,彼佛自當決汝所疑。』釋迦牟尼佛,復遣我來至世尊所言:『斷一切疑如來當為汝說。』是故我今諮問所疑:『云何釋迦牟尼佛住娑婆世界而不般涅槃?』」

彼佛答言:「汝等還去,彼佛自當決斷汝等一切所疑。如是無量釋 迦牟尼如來所使。」爾時,二人俱發聲言:「善哉善哉!唯然受 教。」禮彼佛足奉辭而還,至釋迦牟尼佛所,稽首作禮如是歎言: 「奇哉世尊!釋迦牟尼如來持無量阿僧祇身,悉告我言:『汝等還 去,釋迦牟尼佛當決汝疑,彼佛世尊即是我身。』」

爾時,世尊告文殊等言:「彼諸如來告汝等言:『我即是彼如來身耶?』」

文殊等言:「如是。世尊!一切如來皆作是說。」

爾時,世尊告文殊等言:「彼諸如來世界云何?」

文殊等言:「彼諸世界,無諸沙礫平如澄水,柔軟樂觸猶如綿續,如安樂國無諸五濁,亦無女人聲聞緣覺,唯有一乘無有餘乘。」

佛告文殊等言:「若善男子善女人,稱彼一切諸佛名號,若讀若書若聞乃至戲笑言說,或順他人或欲自顯,若有一切恐怖事至悉皆消滅,一切諸天、龍、夜叉、乾闥婆、阿修羅、迦樓羅、緊那羅、摩睺羅伽等,不能惱亂,聞則擁護閉四趣門,我說未發心者得菩提因,況清淨心若讀若誦若書若聞?央掘魔羅!如來復有奇特大威德力方廣惣持大修多羅說,八十億佛皆是一佛即是我身,如是廣說,如是無量佛剎,如是無量如來,如是如來色身無量無邊,如來成就如是無量功德,云何當有若無常、若疾病?如來常住無邊之身。我今當復廣說有根本,有因有緣,一切佛一切因,悉皆不樂生此世

界,以此眾生不可治故。以是義故,我於此世界治不可治眾生,數數捨身故生不生身(次應實際身、無作身)。

「我於無量阿僧祇劫,為護法故捨恒河沙身,一一身若傷若打若壞故,生此不壞無為之身。我於無量阿僧祇劫眾多住處,精進捨身恒河沙數,一一身住無量劫精進苦行故,生不老身。我於無量阿僧祇劫,生疾疫劫為作良藥,一一身趣恒河沙劫故,生無病身。我於無量阿僧祇劫恒河沙生,為斷無量眾生飢餓之病,施大乘味故,生不死身。我於無量阿僧祇劫恒河沙生,除無量眾生煩惱垢污,為諸難事示如來藏故,生無染污身。我於無量阿僧祇劫恒河沙生,為除無量餓鬼飢渴之病,以一乘味令其飽滿故,生無漏身。我於無量阿僧祇劫恒河沙生,於一切眾生等心愛念,如父如母如子如兄如弟故,生無罪身。我於無量阿僧祇劫恒河沙生,無量眾生、諸天及人不實語者,安立大乘諦故,生諦常身。我於無量阿僧祇劫恒河沙生,無量眾生、諸天及人諸非法眾,安立出世間法故,生此法身。我於無量阿僧祇劫恒河沙生,無量眾生、諸天及人隨邪見者,安立正見故,生此第一寂靜之身。

「我於無量阿僧祇劫恒河沙生,無量眾生、諸天及人有恐怖者,安立無畏故,生安隱身。我於無量阿僧祇劫恒河沙生,無量眾生、諸天及人多憂惱者,安立無憂惱法故,生此無憂離憂之身。我於無量阿僧祇劫恒河沙生,一切天人樂他婬者,安立大尸羅威儀故,生此無塵離塵之身。我於無量阿僧祇劫恒河沙生,無量眾生惡像類者,攝令清淨安立正法故,生此無羸離羸法身。我於無量阿僧祇劫恒河沙生,無量眾生諸天及人諸貧窮者,施財法二藏安立菩提故,生無災法身。我於無量阿僧祇劫恒河沙生,無量眾生、諸天及人隨愛欲者,安立離欲故,生此無量無惱之身。我於無量阿僧祇劫恒河沙生,拂除無量眾生、諸天及人一切煩惱,如除蛇毒故,生此無患離患法身。我於無量阿僧祇劫恒河沙生,與無量眾生、諸天及人,結

法親屬,世間親厚無過法親故,生無作法明顯妙身。我於無量阿僧 祇劫恒河沙生,為無量眾生、諸天及人,如法演說清淨如來藏法 故,生此無所有身。我於無量阿僧祇劫恒河沙生,安立一切諸天世 人,令住如來希有秘密故,生希有身。

「我於無量阿僧祇劫恒河沙生,以佛成就無量眾生諸天及人故,生無量無邊尊勝之身。我於無量阿僧祇劫恒河沙生,為度無量眾生,於處處雜姓示現受生故,生此高身。我於無量阿僧祇劫恒河沙生,令無量眾生度一切有,安立菩提故,生無上身。我於無量阿僧祇劫恒河沙生,現隨世間支節不具,令無量眾生安立菩提故,生無上法身。我於無量阿僧祇劫恒河沙生,不隱恒性如來之藏,為一切眾生安慰說故,生此恒身。我於無量阿僧祇劫恒河沙生,護持淨戒,見天女魔女及世間女不起染心故,生不危脆身。我於無量阿僧祇劫恒河沙生,一切世間尊長女人所不起染心故,生不崩墜身。我於無量阿僧祇劫恒河沙生,為無量眾生、諸天及人,除諸病患故,生此無邊無比之身。我於無量阿僧祇劫恒河沙生,令無量眾生乃至畜生安立深法故,生深遠身。我於無量阿僧祇劫恒河沙生,為一切天人說如來藏如虛空鳥跡,令佛性顯現故,生不可見身。

「我於無量阿僧祇劫恒河沙生,轉無量眾生、諸天及人執無我見, 示以難見如來藏故,生一切眾生難見之身。我於無量阿僧祇劫恒河 沙生,令一切天人不害眾生安立正法故,生微細身。我於無量阿僧 祇劫恒河沙生,令一切天人生法樂故,生圓滿身。我於無量阿僧祇 劫恒河沙生,普示天人如來之藏,如今所見文殊師利故,生不難見 身。我於無量阿僧祇劫恒河沙生,解一切眾生縛安立解脫故,生極 難見身。我於無量阿僧祇劫恒河沙生,天人惡趣一切諸有,普於中 住,悉令安立真實解脫故,生無分身。我於無量阿僧祇劫恒河沙 生,令一切天人淨持五戒故,生無筋骨身。我於無量阿僧祇劫恒河 沙生,善發大願度一切眾生故,生一切處解脫之身。我於無量阿僧 祇劫恒河沙生,拔一切眾生諸惡見箭安立真實法故,生此寂靜不變 易身。我於無量阿僧祇劫恒河沙生,等視一切眾生如羅睺羅,亦令 他等故,生寂止身。

「我於無量阿僧祇劫恒河沙生,為諸聲聞說離食知足故,生斷一切求 波羅蜜身。我於無量阿僧祇劫恒河沙生,捨離一切魚肉美食,亦教 眾生令捨離故,生美妙身。我於無量阿僧祇劫恒河沙生,令無量眾 生諸天及人吐一切煩惱故,生離虛偽身。我於無量阿僧祇劫恒河沙 生,無量眾生惡像類者,壞其住處驅出人眾,猶如火雹故,生破宅 身。我於無量阿僧祇劫恒河沙生,無量眾生迷惑四倒,飲以法味 故,生離慢梵身。我於無量阿僧祇劫恒河沙生,無量眾生如來之藏 寂靜恒道,離亂過惡極令正真故,生寂靜捨身。我於無量阿僧祇劫 恒河沙生,無量眾生無我佛語者,建立有我如指指月故,生捨離 身。我於無量阿僧祇劫恒河沙生,無量般涅槃般涅槃,而不般涅槃 般涅槃故,生如法法身。我於無量阿僧祇劫恒河沙生,盡無量眾生 際,極方便求如來藏垢,不可得故,生此界身。一切眾生悉有此 界。

「我於無量阿僧祇劫恒河沙生,演說大乘無礙智,無我我所真實門故,生無入處身。我於無量阿僧祇劫恒河沙生,成就無量眾生令畏煩惱故,生善出世間上上之身。我於無量阿僧祇劫恒河沙生,為一切眾生而作歸趣,無依作依無親作親故,生如萬流趣大海身。我於無量阿僧祇劫恒河沙生,以無畏心說如來藏經故,生安住身。我於無量阿僧祇劫恒河沙生,捨上宮殿轉輪王位無量快樂入山學道故,生宮殿身安樂不動。我於無量阿僧祇劫恒河沙生,離慢緩眾如避梅陀羅,於淨戒者乃至不同水器故,生不悔身。我於無量阿僧祇劫恒河沙生,輕無量眾生煩惱重擔故,生休息身照然明顯。我於無量阿僧祇劫恒河沙生,毀呰在家如處牢獄故,生一切眾生所求之身。我

於無量阿僧祇劫恒河沙生,令無量眾生斷貪恚癡故,生無病無畏無我所身。我於無量阿僧祇劫恒河沙生,令無量眾生、諸天及人,毀皆女人娛樂煩惱猶如毒蛇故,生此滅身。

「我於無量阿僧祇劫恒河沙生,於燈光如來所修菩薩行聞自受記, **隨順於如不謗經故,生舍宅身。我於無量阿僧祇劫恒河沙生,聞如** 來藏,一切眾生斷諸煩惱便得成佛,因其信樂覆護眾生故,生覆護 身。我為菩薩時,無量阿僧祇劫恒河沙生,作忍辱仙人行四無量 故,生一切眾生依怙之身。我於無量阿僧祇劫恒河沙生,常為無量 諸天世人,演說大乘一乘無上乘無礙之智,極大照明一切眾生所趣 向乘,彼聞說已,以是大乘破阿僧祇惡故,生趣向身。我於無量阿 僧祇劫恒河沙生,讚歎界安隱界一切眾生第一界無垢如來藏,無合 會故,生無合會身。我於無量阿僧祇劫恒河沙生,令無量眾生、諸 天及人入白淨解脫天舍宅故,生虛曠無限容受勝身。我於無量阿僧 祇劫恒河沙牛,無量眾牛若男若女,作父母兄弟姊妹想故,牛一切 處無上父身。我於無量阿僧祇劫恒河沙牛,於飢饉劫以無量身施彼 食故,生一切處離飢渴病身。我於無量阿僧祇劫恒河沙生,為無量 眾生,毀呰一闡提惡令生怖畏故,生此捨離一切有身。我於無量阿 僧祇劫恒河沙牛,示現無量方便身法身勝藥樹身,不增不善因故, 牛一切無行寂止之身。

「我於無量阿僧祇劫恒河沙生,度無量眾生令滅煩惱,示其自性,如於掌中視菴羅果故,生斷道身。我於無量阿僧祇劫恒河沙生,為無量眾生毀呰一切有,如四毒蛇、如空瓶故,生離津溜筋脈之身。 我於無量阿僧祇劫恒河沙生,為無量眾生,滅一切有無量煩惱,離欲滅盡涅槃故,生涅槃不動快樂之身。央掘魔羅!我於無量阿僧祇劫,一切無際處住而復住此。央掘魔羅!涅槃即是解脫,解脫即是如來。」

央掘魔羅經卷第三

央掘魔羅經卷第四

宋天竺三藏求那跋陀羅譯

爾時,央掘魔羅白佛言:「世尊!奇哉如來!哀愍一切眾生,為第一難事。」

佛告央掘魔羅:「非是如來為第一難事,更有第一難事。謂於未來 正法住世餘八十年,安慰說此摩訶衍經常恒不變如來之藏,是為甚 難。若有眾生持諸同類,是亦甚難。若有眾生聞說如來常恒不變如 來之藏,隨順如實,是亦甚難。」

央掘魔羅白佛言:「世尊!何如為難?」

佛告央掘魔羅:「譬如大地荷四重擔。何等為四?一者大水,二者 大山,三者草木,四者眾生。如是大地荷此四擔。」

央掘魔羅白佛言:「如是。世尊!」

佛告央掘魔羅:「非是大地荷四重擔。所以者何?餘復更有荷重擔者。」

央掘魔羅白佛言:「誰耶?世尊!」

佛告央掘魔羅:「正法住世餘八十年,菩薩摩訶薩為一切眾生,演說如來常恒不變如來之藏,當荷四擔。何等為四?謂兇惡像類常欲加害,而不顧存亡棄捨身命,要說如來常恒不變如來之藏,是名初擔,重於一切眾山積聚。兇惡像類非優婆塞,以一闡提而毀罵之,聞悉能忍,是第二擔,重於一切大水積聚。無緣得為國王大臣大力勇將及其眷屬說如來藏,唯為下劣形殘貧乞堪忍演說,是第三擔,重於一切眾生大聚。窮守邊地多惱之處,衣食湯藥眾具麁弊,一切

苦觸無一可樂,男悉邪謗女人少信,城郭丘聚豐樂之處不得止住, 是第四擔,重於一切草木積聚。若能荷此四重擔者,是名能荷大擔 菩薩摩訶薩。若菩薩摩訶薩,於正法欲滅餘八十年,棄捨身命,演 說如來常恒不變如來之藏,是為甚難;若能維持彼諸眾生,是亦甚 難;彼諸眾生聞說如來常恒不變如來之藏,能起信樂,是亦甚難。

「復次,央掘魔羅!非是如來為第一難事,今當更說復有難事。譬如士夫其壽無量,過無量百千億歲,以一毛端渧大海水,復過是數,以一毛渧乃至將竭餘如牛跡,為甚難不?」

央掘魔羅言:「甚難,世尊!不可稱說。」

佛告央掘魔羅:「此不為難,更有甚難。」

央掘魔羅言:「誰耶?世尊!」

佛告央掘魔羅:「正法住世餘八十年,若有菩薩摩訶薩,棄捨身命,演說如來常恒不變如來之藏,是為甚難。

「復次,央掘魔羅!非是如來為第一難事,更有難事。央掘魔羅!譬如士夫擔須彌山王及大地大海經百億歲,此為大力第一難不?」

央掘魔羅白佛言:「如是如來境界,非彼聲聞緣覺所及。」

佛告央掘魔羅:「彼非大力非為甚難,若以大海一塵為百千億分, 百千億劫持一塵去,乃至將竭餘如牛跡;復能擔負須彌山王大地河 海,百千億劫,而彼不能於正法住世餘八十年時,演說如來常恒不 變如來之藏,唯有菩薩人中之雄,能說如來常恒不變如來之藏護持 正法,我說此人第一甚難。

「復次,央掘魔羅!譬如士夫能以水滅三千大千世界熾然盛火,如是士夫為甚難不?」

央掘魔羅白佛言:「世尊!滅一天下火尚為極難,況復三千大千世界?是為甚難。」

佛言:「如是。央掘魔羅!未來世中持戒眾減、犯戒眾增,正法住世餘八十年,菩薩摩訶薩棄捨身命奴婢牛羊非法財物,種種清淨宣說正法,演說如來常恒不變如來之藏,此何士夫?」

央掘魔羅白佛言:「唯佛能知,非聲聞緣覺。爾時,護持世間淨法 猶尚為難,何況出世間上上如來常恒不變如來之藏?如彼士夫能以 水滅三千大千世界熾然盛火,極為甚難。若於未來正法住世餘八十 年,菩薩摩訶薩棄捨身命,演說如來常恒不變如來之藏,當知彼人 即是如來。」

佛告央掘魔羅:「善哉善哉!善男子!我亦如是說,一切如來說彼 士夫所為難事不得邊際。

「復次,善男子!譬如百川入于大海,別流不現,如是士夫所得智慧,一切士夫來入其中,悉皆不現。

「復次,善男子!譬如大海不受死屍,如是士夫無諸戲行家愛家病雜亂非法,謗如來藏者不與同止,如是士夫極為甚難,維持彼眾及聽法者,是亦甚難。」

央掘魔羅白佛言:「世尊!菩薩摩訶薩,成就幾相名非新學?」

佛告央掘魔羅言:「善男子!菩薩摩訶薩成就八相非為新學。何等 為八?一者知法,二者知思量持,三者供養父母,四者知師恩,五 者厭諸惡見,六者離一切相輕慢、不調伏、不善不淨之物,七者不 思欲乃至夢中亦不起想,八者敬重於戒。如是菩薩摩訶薩成就八 相,非為新學。 「復次,菩薩摩訶薩成就八相,非為新學。何等為八?一者說摩訶 衍,二者分明演說如來之藏而不厭捨,三者不貪財物,四者慈悲喜 捨忍,五者視一切眾生猶如一子,六者近善知識,七者離惡知識, 八者世利知足。菩薩成就如是八相,非為新學。

「復次,菩薩成就八相,非為新學。何等為八?一者安慰知量美 說,二者不嬉戲,三者煩惱微薄忍,四者聞一切經忍,五者降伏睡 眠,六者不懶惰,七者精勤不放逸,八者常樂求戒。菩薩成就如是 八相,非為新學。

「復次,菩薩成就八相,非為新學。何等為八?一者真實,二者鮮 淨樂習淨事,三者光澤,四者端政,五者遠離女人,六者遠離親 族,七者聞惡恐怖彼彼惱亂身毛皆竪,八者愍念眾生。菩薩成就如 是八相,非為新學。

「復次,菩薩成就八相,非為新學。何等為八?一者善知佛說魔說 差別,二者恭敬知經者,三者知律非律差別二隱覆,四者善知如來 隱覆之說,五者知如來祕密,六者善知隨順世聞事,七者善知如來 常恒不變,八者善知菩薩惡非惡事,善知時方自能。菩薩成就如是 八相,非為新學。

「成就如是四十相身念法,是菩薩非為新學。若無四十功德,若半減半,當知善男子善女人不住摩訶衍,亦不入諸菩薩數。是故菩薩行則為甚難。彼何等勝功德?謂無欲想乃至夢中亦不起心,當知是人有一切覺支殊勝功德。」

爾時,文殊師利語央掘魔羅言:「如來藏者有何義?若一切眾生悉有如來藏者,一切眾生皆當作佛,一切眾生皆當殺、盜、邪婬、妄語、飲酒等不善業跡。何以故?一切眾生悉有佛性,當一時得度。

若有佛性者,當作逆罪及一闡提。若有我者我界,當度一切有。是故世間,無有我無有界,一切法無我是諸佛教。」

佛告文殊師利:「一切眾生有如來藏,為無量煩惱覆,如瓶中燈。復次,文殊師利!譬如有一調伏子,迦葉如來為授記言:『却後七年當為轉輪聖王正法治化,我亦却後七日當般涅槃。』時調伏子聞授記已歡喜踊躍,作是念言:『一切智記我當得轉輪聖王,我今不疑。』即白母言:『與我魚肉乳酪麻豆種種美食,我當有力。』彼并食雜食肉故,不能自活非時而死。云何文殊師利!彼佛為妄語耶?為非一切智耶?為彼實無轉輪聖王善根果報耶?」

文殊師利白佛言:「世尊!彼本惡業故致此死。」

佛告文殊師利:「勿作是說,彼非時死耳,非本惡業報也。文殊師利!彼佛不知先惡業報而記之耶?無先惡業今自作過以致失命耳。如是文殊師利!若男子女人作是念言:『我身中有如來之藏,自當得度,我當作惡。』若如是作惡者,為佛性得度耶?不得度耶?如上所說彼調伏子,實有王性而不得度。所以者何?以多放逸故。佛性不度亦復如是,以彼眾生多放逸故。一切眾生為無佛性耶?實有佛性如轉輪王報。為佛妄語耶?眾生妄語作諸放逸,以聞法放逸故,自過惡故不得成佛。」

文殊師利白佛言:「世尊!一切眾生無本業耶?」

佛告文殊師利:「彼有本業,但少聞此經,無量阿僧祇罪皆悉除滅。所以者何?如來無量阿僧祇劫發大誓言:『一切眾生未度令度,未脫令脫。』以此誓願善根,如來慧日光明所照,無量阿僧祇罪皆悉除滅。復次,文殊師利!譬如一切雲霧覆過,日未出時皆悉障蔽一切世間,日光少出一切世間闇障悉滅。如是阿僧祇大罪積聚,乃至此經日未出時,一切眾生輪迴生死;此經日出,阿僧祇惡

大閤積聚一彈指頃,於如來常恒不變如來之藏,若戲笑說若隨順他,此及道外,若波羅夷無間惡業,阿僧祇罪須臾悉滅。所以者何?若聞釋迦牟尼如來名號,雖未發心已是菩薩。所以者何?以如來勝願一切世間是我有故,諸未度者當令得度,化以正法悉令覺悟。是故文殊師利!聞如來名者皆為菩薩,非但自能速除煩惱,亦復當得我所得身。文殊師利!如我偈說:

「『我已稱說道, 憂悲毒刺拔, 汝等應當作, 如來之所說。』

「我說道者,說何等道?道有二種,謂聲聞道及菩薩道。彼聲聞道者,謂八聖道;菩薩道者,謂一切眾生皆有如來藏。我次第斷諸煩惱得佛性,不動快樂甚可愛樂,若不斷者恒輪轉生死。『我已稱說道,憂悲毒刺拔』,憂悲者謂煩惱義,拔刺者謂如來。我斷除無量煩惱,為大醫王,汝等當從我受,我當示汝如來之藏。『汝等應當作』者,隱覆說義。『如來之所說』者,此生欺誑汝欺誑汝。佛出世間如優曇鉢華,得信猶如恒沙金粟,亦如盲龜值浮木孔,如是遇如來、應供、等正覺如來藏經,不以生死壽果欺誑汝等,自度一切有及一切煩惱病,是故言『如來之所說』。

「『精勤諸善法, 折伏諸惡心, 修福遲緩者, 意樂著諸惡。』

「此偈我為聲聞說。又如來藏者極為難得,世間無有如是難得,譬類如來之藏,當疾觀察,如是如是意樂著諸惡者,比丘自性淨心,心習惡知識過,五垢為首,眾多煩惱前後圍繞。云何五垢為本,諸煩惱圍繞?所謂貪欲、瞋恚、睡眠、掉、疑。此五垢壞心,欲淨除五垢本及諸煩惱者,當勤方便自性清淨心力,當勤方便及未謗修多羅未成一闡提,當勤方便修習自度。以是義故,說彼心無量客塵煩惱,應當疾疾拔其根本。

「『意法前行, 意勝<mark>意</mark>生, 意法淨信。若說若作, 快樂自追, 如影隨形。』

「我為聲聞乘說。此偈意者,謂如來藏義。若自性清淨意,是如來 藏勝一切法,一切法是如來藏所作。及淨信意法,斷一切煩惱故, 見我界故。若自淨信有如來藏,然後若說若作,得成佛時若說若 作,度一切世間如人見影,見如來藏亦復如是,是故說如影隨形。

「『意法前行, 意勝意生, 意法為惡。若說若作, 眾苦自追, 如輪隨跡。』

「(謂一轅兩輪,二牛牽之故輪隨跡。)

「此偈說煩惱義。意法惡者,為無量煩惱所覆造作諸惡,故名為 惡。不知自性心如來藏,入無量煩惱義,如是躁濁不息故,若說若 作,一切眾苦常隨不絕。如輪隨跡者,諸惡積聚生死輪迴,轉一切 眾生於三惡趣中,如輪隨跡,是故說於福遲緩者心樂於惡法。

「復次,文殊師利!如知乳有酥故,方便鑽求,而不鑽水,以無酥故。如是文殊師利!眾生知有如來藏故,精勤持戒淨修梵行。復次,文殊師利!如知山有金故,鑿山求金,而不鑿樹,以無金故。如是,文殊師利!眾生知有如來藏故,精勤持戒淨修梵行,言:『我必當得成佛道。』復次,文殊師利!若無如來藏者空修梵行,如窮劫鑽水終不得酥。」

文殊師利白佛言:「世尊! 梵行有何義?何故如來捨五欲樂?」

央掘魔羅謂文殊師利言:「無量天人常知墮法,故離諸欲想。」

佛告央掘魔羅:「勿作是說。一切眾生有如來藏,一切男子皆為兄弟,一切女人皆為姊妹。」

央掘魔羅白佛言:「世尊!云何淨飯王、摩耶夫人,兄弟姊妹而作 父母?」

佛告央掘魔羅:「是方便示現度脫眾生,若不如是則不能度。譬如 大王有二千力士,二人方便現相折伏,以悅王心娛樂眾人,唯彼自 知餘無能覺。佛亦如是,示因父母現同人事,然後得度無量眾生, 令出生死無邊大海,而彼眾生莫能知者。譬如伎兒於大眾中,種種 變現以悅眾心。諸佛世尊亦復如是,種種變現以度眾生,而彼眾生 莫能知者。譬如幻師於大眾中,自斷身分以悅眾人,而實於身無所 傷損。諸佛世尊亦復如是,如彼幻師種種變現以度眾生。文殊師 利!如來一切智知一切,觀察世間一切眾生,無始已來無非父母兄 弟姊妹,昇降無常迭為尊卑,如彼伎兒數數轉變,是故如來淨修梵 行。

「復次,文殊師利!彼此自界共相娛樂,如何受樂?自餘身分,云何不得,不成界報?當知是樂是大苦聚,女有佛藏男亦如是。云何一性而自染著?以一性故,是故如來淨修梵行,住於自地不退轉地得如來地。」

文殊師利白佛言:「世尊!何故如來,不以一切梵行建立優婆塞、優婆夷?何故世尊!說比丘、比丘尼、優婆塞、優婆夷正法因故,如堂四柱?而今優婆塞、優婆夷現有大惡,何故建立於正法律中?」

佛告文殊師利:「此異想名世俗想,如來視一切眾生如羅睺羅,常 欲安立令住佛地無此階漸,佛想異此俗想,異此名非問論。」

文殊師利白佛言:「世尊!以一切眾生界是一界故,諸佛離殺生耶?」

佛言:「如是。世間殺生如人自殺,殺自界故。」

文殊師利白佛言:「世尊!何故視一切眾生如羅睺羅,而復教人調 伏殺罰有自界諸惡像類者?」

佛告文殊師利:「善男子!莫作是說。如來如是視一切眾生如羅睺羅。譬如士夫常日再食,愛樂法故日唯一食則殺八萬戶蟲,如是者應名殺生,而非殺生不淨。復次,文殊師利!無邊欲樂聖所背捨,聖人為害欲故自害,若如是者,聖人則有自害過惡,謂愛欲心盛至他所言:『我起欲心願見教誡令生慚愧,我存亡無在,則方便自害。』如是者為害自界耶?」

文殊師利白佛言:「不也。世尊!彼乃因是功德增積。」

佛告文殊師利:「如是。文殊師利!何故諸聖自害?以是煩惱毒蛇 因故,而況他身?佛所說法,諸惡像類壞正法者,如自煩惱盛而教 誡彼為作諸難,則為供養自界,如自求畢竟樂,棄捨欲樂衣食命 樂,如自害身而調伏彼,是名善知如來之藏。」

文殊師利白佛言:「世尊!因如來藏故,諸佛不食肉耶?」

佛言:「如是。一切眾生無始生死生生輪轉,無非父母兄弟姊妹, 猶如伎兒變易無常,自肉他肉則是一肉,是故諸佛悉不食肉。復 次,文殊師利!一切眾生界我界即是一界,所宅之肉即是一肉,是 故諸佛悉不食肉。」

文殊師利白佛言:「世尊!珂貝蠟蜜皮革繒綿,非自界肉耶?」

佛告文殊師利:「勿作是語。如來遠離一切世間,如來不食,若言 習近世間物者,無有是處。若習近者是方便法,若物展轉來者則可 習近,若物所出處不可習近,若展轉來離殺者手則可習近。」

文殊師利白佛言:「今此城中有一皮師能作革屣,有人買施,是展轉來,佛當受不?復次,世尊!若自死牛,牛主從旃陀羅取皮,持

付皮師使作革屣,施持戒人,此展轉來可習近不?」

佛告文殊師利:「若自死牛,牛主持皮用作革屣,施持戒人,為應 受不?若不受者是比丘法,若受者非悲,然不破戒。」

文殊師利白佛言:「世尊!亦不得用不淨水熟食,比丘不應受,若如是者如是現。」

佛告文殊師利:「此名世間想。若有優婆塞者,以淨水作食而不得作用;若無優婆塞者,諸佛其如之何?陸蟲水蟲虛空亦蟲,若如是者於淨宗為惡,世間云何得修淨宗?此名非問論。」

文殊師利白佛言:「世尊!世間久來亦自立不食肉。」

佛告文殊師利:「若世間有隨順佛語者,當知皆是佛語。」

文殊師利白佛言:「世尊!世間亦說有解脫,然彼解脫非解脫,唯佛法是解脫;亦有出家而非出家,唯有佛法是出家。世尊!世間亦說我不食肉,彼等無我亦無不食肉,唯世尊法中,有我決定不食肉。」

佛告文殊師利:「汝欲聞世間建立外道因不?當為汝說。」

文殊師利白佛言:「唯然世尊!願樂欲聞。」

佛告文殊師利:「乃往過去無量阿僧祇劫時世有佛,名拘孫陀跋陀羅,出興于世在此城中。時彼世界無諸沙礫,無外道名唯一大乘,彼諸眾生一向快樂。爾時,如來久住於世乃般涅槃,般涅槃後正法久住,法欲滅時持戒者減,非法者增。有一阿蘭若比丘名曰佛慧,有一善人施無價衣,比丘愍彼即為受之。比丘受已示諸獵師,諸獵師眾見此好衣生劫盜心,即於其夜將是比丘至深山中,壞身裸形懸手繫樹。爾時,其夜有採花婆羅門,至阿蘭若處,見虎恐怖向山馳

走,見彼比丘壞身裸形懸手繋樹,見已驚歎:『嗚呼沙門!先著架 **淡而今裸形,必知袈裟非解脫因,自懸苦行是真學道。』彼人豈當** 捨離善法,當知分明是解脫道因,壞正法故即捨衣拔髮作裸形沙 門,裸形沙門從是而起。爾時,比丘自得解縛已,即取樹皮赤石塗 染以自障蔽,結草作拂用拂蚊蟲。更有採花婆羅門見已念言:『是 比丘捨先好衣,著如是衣、捉如是拂。彼人豈當捨離善法,當知分 明是解脫道。』即學彼法,出家婆羅門從是而起。時彼比丘暮入水 浴,因洗頭瘡,即取水衣以覆瘡上,取牧牛人所棄弊衣以自覆身。 時,有樵者見已念言:『是比丘先著袈裟而今悉捨,必知袈裟非解 脫因,故被髮弊衣日夜三浴修習苦行。彼人豈當捨離善法,當知分 明是解脫道。』即學彼法,苦行婆羅門從是而起。比丘浴已身體多 瘡蠅蜂唼食,即以白灰處處塗瘡,以水衣覆身。時,有見者謂言是 道。即學彼法,灰塗婆羅門從是而起。時彼比丘然火炙瘡,瘡轉苦 痛不能堪忍,投巖自害。時,有見者作是念言:『是比丘先著好衣 今乃如是。彼人豈當捨離善法,當知投巖是解脫道。』投巖事火從 是而起。如是九十六種,皆因是比丘種種形類,起諸妄想各自生 見。譬如有國一一相視而起麁想,麁想生已各各相殺,九十六種道 各生異想,亦復如是。猶如鹿渴於炎水想追逐乏死。正法滅時,因 彼比丘非法法想亦復如是。如是文殊師利!世間一切所作之上,尸 羅威儀種種所作,一切悉是如來化現,法滅盡時如是事生,若如是 者正法則滅。如是,文殊師利!於真實我世間如是,如是邪見諸異 妄想,謂解脫如是,謂我如是出世間者,亦不知如來隱覆之教,謂 言無我是佛所說,彼隨說思量如外道因起。彼諸世間隨順愚癡,出 世間者亦復迷失隱覆說智。是故如來說一乘中道離於二邊,我直 實、佛真實、法真實、僧真實,是故說中道名摩訶衍。」

爾時,央掘魔羅白佛言:「世尊!眾生不知中道,妄想說餘中道。」

佛告央掘魔羅:「少有眾生聞此經信,未來眾生多謗此經。」

央掘魔羅白佛言:「世尊!唯願為說,何方幾所眾生誹謗此經?幾一闡提,何方有能廣為眾生安慰說者?唯願如來哀愍為說。」

佛告央掘魔羅:「未來世中,中國當有九十八百千億眾生謗毀此經,七十億眾生作一闡提;東方九十八千億眾生謗毀此經,六十億眾生作一闡提;西方九十八百億眾生謗毀此經,五十億眾生作一闡提;南方九十八億眾生謗毀此經,四十億眾生作一闡提。罽賓國中有我餘法,婆樓迦車國餘名不滅,頻陀山國亦復如是。罽賓比丘半半行摩訶衍,半半樂摩訶衍說摩訶衍。南方當有行堅固道、行如來行,離八大事,說如來常恒不變如來之藏,菩薩摩訶薩、比丘、比丘尼、優婆塞、優婆夷,行堅固道任荷我法。」

爾時,文殊師利白佛言:「世尊!奇哉佛法,當住南方。」

佛告文殊師利:「如是如是,我法當住南方少時。如汝等苦行菩薩摩訶薩不惜身命,安慰一切眾生故,說如來常恒不變如來之藏,如一切諸佛,悉皆不樂至此世界荷負三千大千世界無量眾生,而我獨能於此度脫。我菩薩摩訶薩正法欲滅餘八十年,爾時,不樂任持正法,亦復如是。如汝等文殊師利!正法欲滅餘八十年,當於爾時,任荷正法,一切閻浮提及諸洲間不惜身命,演說如來常恒不變如來之藏,彼時眾生或信或不信。彼諸菩薩作是念言:『若斷截我身作種種分,我當由此得常住身。』如汝文殊師利等無量菩薩摩訶薩,於彼南方任荷正法,第一最難,是故我常讚歎南方最後說法。由彼菩薩威德力故,一切閻浮提及諸洲間,彼諸眾生聞名迴向,或因慚愧或因恐怖故。譬如有王聞餘王法而自治國,罽賓國及伽樓迦車城,慚愧恐怖故,說摩訶衍祕密之藏,亦復如是,然不說如來常恒不變如來之藏。文殊師利!譬如放火草中,唯燒中間不燒邊際。我

初生地堅固道滅,餘法住於南方邊際,諸菩薩於彼任荷正法,亦復如是,當知彼中則有如來。」

爾時,釋提桓因與三十三天諸眷屬俱,稽首佛足興大供養已,白佛言:「世尊!我等當共護持此經,願見付授,唯願哀愍一切眾生說此經名。」

佛告天帝釋言:「憍尸迦!此經名為『央掘魔羅』,如是受持。憍尸迦!此經難得如優曇鉢華。」

時帝釋長子名阿毘漫柔,頂禮佛足白佛言:「世尊!如我父王與阿修羅戰時,告馭者言:『汝當莊嚴伏阿修羅車。』馭者白王:『願勿憂慮。我要先死然後及王,今當畢命堅意決戰,餘人亦當捨身盡力。』如是,世尊!於未來世正法欲滅八十年時,菩薩摩訶薩說如來常恒不變如來之藏。復作是念:『我說法時多有眾生不能堪忍,我當不說。』爾時,莫令諸善男子聞彼諸難生退轉心,當知善馭莊嚴法乘如如來藏,如來常恒寂靜不變廣宣世間,彼善男子說如來常恒不變如來之藏。我於爾時,當作比丘棄捨身命而為作護。」爾時,眾多帝釋子,若男若女及餘諸天,頂禮佛足而發誓言:「我當作比丘、比丘尼、優婆塞、優婆夷,棄捨身命而為作護。」

時佛歎言:「善哉善哉!善男子!汝等皆是求正法者,我亦當為諸樂法者而作覆護,我亦常當於彼前行如善馭者,汝等常當堅固知恩,於如來常處、恒處、寂靜處、不變易處如來藏處,當廣宣說。」

爾時,波斯匿王具四種兵告諸大臣言:「今有人像羅剎殺害多人一千少一,以指為鬘以血塗身,勇健驍捷縱暴此境,今去此城減四十牛鳴,或能害我及諸臣子以充其數,今當共行剪除殺鬼。今此城中一切男女欲求取者悉不敢出,一切鳥獸聞其惡名亦所不至。汝等今

當宣令內外:『波斯匿王今興四兵,罰彼羅剎央掘魔羅,一切皆當持器仗來,若能與彼盡力共戰,若傷不傷隨功賞賜,象馬珍寶城邑土田,隨其所欲悉當與之。』」聞彼惡名莫不震慴,如是宣唱無一應命。唯王左右不得自在,抑逼威顏俛仰祗順。時諸妃后啼泣上諫:「寧失國位願勿自征。」即召太卜問其吉凶:「今當能制央掘魔羅不?」卜筮咸曰:「彼今當滅。」雖聞是語王猶不信,將四種兵往詣佛所稽首佛足,有怖畏色額上流汗却坐一面。

爾時,世尊一切智知一切,知而故問:「大王!今日何故流汗?」

王白佛言:「今有羅剎名央掘魔羅,殺害人民一千少一,以指作鬘以血塗身,恐其不息與我共戰,舉國人民悉皆怖畏,杜門不出事業 斯廢,一切鳥獸悉不敢近,嚴此四兵欲往罰之。」

佛告王曰:「今大王欲罰彼耶?」

王白佛言:「今唯一心取信佛足。」

佛告大王:「若央掘魔羅來至此者,王當云何?」

爾時,四兵悉大恐怖,唯王不畏,恃佛威德故。王白佛言:「若彼來者如是為一。」

爾時,世尊指示王言:「此即常勝央掘魔羅。」王見央掘魔羅瞪矚不眴,觀其形相赤眼雄姿,心驚毛竪如非人所持,勇猛心退刀劍自落,漸近如來師子之座,一心至誠歸依如來,當視我等如羅睺羅。于時四兵倍增惶怖,迷亂顛沛奔馳逃竄。

爾時,世尊放安慰眾生無畏光明,照彼眾生令身安樂。爾時,波斯匿王內外眷屬城邑人民,咸作是念:「今央掘魔羅為世尊所伏。」

波斯匿王作是歎言:「奇哉世尊!真為第一調御之軛,真為無上天人之師,如是兇暴大惡業者,乃能方便安立正法。」

爾時,世尊說偈歎言:

「人前放逸, 後止不犯, 是照世間, 如月雲消。

「若菩薩摩訶薩,先現放逸後現功德,是照世間如月雲消,度無量 眾生現如來功德。大王!當知彼非惡人,是則菩薩善方便耳。」

王白佛言:「以何義故言非惡人?先辱師婦,受行惡師毘舍遮行。」

佛告大王:「彼不辱師婦,彼亦非師,現為彼師及婦色像變易其心,習樂師法言常清淨。大王當知!是大奇特,譬如龍象衝擊非驢所堪。如是大王!如來人中大龍象王,隱覆言教秘密說耳,聲聞緣覺皆所不堪,唯佛與佛乃能堪任。大王!南方去此過六十二恒河沙剎有國,名一切寶莊嚴,佛名一切世間樂見上大精進如來、應供、等正覺,在世教化,無有聲聞緣覺之乘,純一大乘無餘乘名。彼諸眾生無有老病及不可意苦,純一快樂,壽命無量,光明無量,純一妙色,一切世間無可為譬,故國名一切寶莊嚴,佛名一切世間樂見上大精進。王當隨喜合掌恭敬,彼如來者豈異人乎?央掘魔羅即是彼佛,諸佛境界不可思議。」

爾時,波斯匿王語諸占師:「汝等一切悉皆妄語,汝速遠去勿復妄說。」

爾時,諸天世人及諸龍神,聲聞菩薩波斯匿王,一切城邑聚落人民,承佛威神悉皆來集,稽首敬禮央掘魔羅足,一心同聲說偈歎言:

「南無如來無邊身, 南無方便央掘魔, 我今頂禮聖足下, 懺悔天尊柔軟足。 我今懺悔如來尊, 央掘魔羅二生身, 為我等故來至此, 現佛色像勝光焰, 照諸眾生堪能說, 我數懺謝無量身, 無依作依等正覺, 無親怙者為作親。 奇哉二佛出于世, 未曾有法行世間, 猶如火中生蓮華, 世間希有見二佛。」

爾時,世尊告波斯匿王言:「北方去此過四十二恒河沙剎,有國名常喜,佛名歡喜藏摩尼寶積如來、應供、等正覺,在世教化。彼土無有聲聞緣覺,純一大乘無餘乘名,亦無老病眾苦之名,純一快樂,壽命無量,光明無量,無有譬類,故國名常喜。佛名歡喜藏摩尼寶積如來、應供、等正覺,王當隨喜合掌恭敬。彼如來者豈異人乎?文殊師利即是彼佛。若有眾生向央掘魔羅、文殊師利恭敬作禮,若復聞是二人名者,見歡喜國如見自家,聞彼名故常閉四趣,或以戲笑或隨順他,或為名利,此及外道,或犯重禁五無間罪,亦閉四趣。若善男子善女人為二名所護者,若今現在及未來世,曠野嶮難諸恐怖處皆悉蒙護,於一切處恐怖悉滅,若天、龍、夜叉、乾闥婆、阿修羅、迦樓羅、緊那羅、摩睺羅伽、毘舍闍眾,悉不能干。」

爾時,世尊告波斯匿王:「如來所說有如是大威德,菩薩所行有如是大威德,文殊師利及央掘魔羅,有如是大威德,於此二龍發隨喜心,能起菩薩無量之行。大王!汝當給養央掘魔母,勿得遺忘。此央掘魔羅母,是我方便之所守護。」

爾時,央掘魔羅母,身昇虛空高七多羅樹,而說偈言:

「如來所變化, 眾生悉不知, 如來所作幻, 眾幻中之王, 大身方便身, 是則為如來。」 說此偈已即沒不現。爾時,波斯匿王白佛言:「世尊!此為幻耶?」

佛告大王:「此是化母,如化母所說,菩薩行亦如是。」

爾時,央掘魔羅師摩尼跋陀羅,身昇虛空高七多羅樹,而說偈言:

「譬如野干獸, 常與師子游, 雖久相習近, 其聲不相類, 間彼聲怖死, 況能師子吼? 我如彼小獸, 雖久為彼師, 不能堪任發, 人雄無畏聲, 若彼非方便, 我則必當死。 豈堪受彼供, 我如野干獸, 菩薩悉遠離, 我行愚癡法, 於一切眾生, 等視如一子。 佛仆無量幻, 眾生不能知, 婆羅門師長, 設化百千億, 眾生悉不知, 唯佛知佛幻, 當知佛世尊, 一切幻中王。」

爾時,彼師摩尼跋陀羅婦,而說偈言:

「嗚呼諸眾生, 不知佛功德, 謂實旃摭女, 不知如來化, 示現作我身, 幻化亦如是。 大王應當知, 佛身不思議, 尚不得近王, 彼諸旃陀羅, 恐怖常畏死, 何況對言說。 此人彼亦人, 不敢相習折, 況復諸天人, 親沂轉佛小。 無量天龍神, 常供養如來, 彼即斷其命。 惡心向佛者, 佛以巧方便, 示現種種幻, 制未來眾生, 無量諸非法, 佛幻為大幻, 如來方便身。」 說是語已即沒不現。爾時,波斯匿王聞見如是諸希有事,歡喜踊躍白佛言:「世尊!為是幻耶?」

佛言:「大王!如彼師及師婦、央掘魔羅母,彼三人者悉是我幻。 我示幻化不可思議,因我教化央掘魔羅,度無量眾生。」

時波斯匿王白佛言:「世尊!我當七日修行大施,央掘魔羅如來在 福田方今為福田。」

佛告王言:「如是如是。」

爾時,諸天龍神共說偈言:

「南無幻化王, 具足大精進, 如來方便身, 方便相具足, 方便般涅槃, 示現捨舍利。 如來無邊身, 智慧亦無邊, 無邊善名稱, 無邊明力士, 如來無邊身, 密迹無有邊, 隱覆亦無邊, 言說亦無邊, 光明亦無邊。 無邊照世間, 無稱不可量, 功德過數量, 虚空無礙智, 如來虚空身。 安慰文殊事, 及與我等類, 為央掘魔羅, 故佛世尊來。 若來及不來, 非我等所知, 如來視一切, 猶如羅睺羅。」

爾時,世尊說是經已,諸天、龍神、聲聞、菩薩及波斯匿王一切眾會,皆慕央掘魔羅行及文殊師利菩薩行,願生彼國,皆發阿耨多羅三藐三菩提心,踊躍歡喜。

央掘魔羅經卷第四

CBETA 贊助資訊

(http://www.cbeta.org/donation/index.php)

自 2001 年 2 月 1 日起, CBETA 帳務由「財團法人西蓮教育基金會」承辦,並成立「財團法人西蓮教育基金會」- CBETA 專戶, 所有捐款至 CBETA 專戶皆為專款專用,歡迎各界捐款贊助。

您的捐款本協會皆會開立收據,此收據可在年度中申報個人或企業的綜合所得稅減免。 感恩諸位大德的善心善行,以及您為佛典電子 化所做的一切貢獻。

信用卡線上捐款

本線上捐款與聯合信用卡中心合作,資料傳送採用 SSL (Secure Socket Layer) 傳輸加密,讓您能夠安全安心地進行線上捐款動作。

前往捐款

信用卡 (單次 / 定期定額) 捐款

本授權書可提供單次捐款或定期定額捐款之用途。

請於下載並填妥捐款授權書後,請傳真至 02-2383-0649,並請來 電 02-2383-2182 確認。

或掛號寄至 10044 台灣台北市中正區延平南路 77 號 8 樓 R812 財團法人西蓮教育基金會收。

請在此下載 授權書 (MS Word 格式)

劃撥捐款

郵政劃撥帳號:19538811

戶名: 財團法人西蓮教育基金會

欲指定特殊用途者,請特別註明,我們會專款專用。

線上信用卡 / PayPal 捐款

PayPal 是一個跨國線上付款機制的公司, CBETA 引用其服務,提供網友能在線上使用信用卡或 PayPal 帳戶贊助 CBETA。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project.

相關收據開立事宜,由於付款幣別為美元,我們除了會依您所贊助之美元金額開立收據外,另我們會依捐款當日公告匯率開立台幣收據,此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

<u>線上信用卡 / PayPal 贊助</u>

支票捐款

支票抬頭請填寫「財團法人西蓮教育基金會」。

CBETA is part of Seeland Educational projects, any donation (ex-cheques, remittance, etc.,) please entitle to "The Seeland Education Foundation".